



104/104

c5

ph





De l'office & pre-
sence de l'Ec-
clesiastique & du
Magistrat.



M. D. LXXXXI.

Casey
F
39
326

159/cx

THE NEWTERRY
LIBRARY



AVX GOUVERNEURS

& Iuges de la France, & particulièrement à Monseigneur François de Montmoréci sieur du Hallot, Cheualier des ordres du Roy, Capitaine de cét hommes d'armes, & l'un de ses Lieutenans généraux en Normandie aux bailliages de Rouen & Eureux.

T Reshonoré Seigneurs, encores que ce desir m'eust quelquefois espointonné de veoir quelqu'un de ceux qui par les rayons de leur sçauoir & eloquence honorent nostre Frâce, lequel s'auāçast pour discourir de ce sujet, avecques tel ornement que il merite. Si est-ce que retenus pour la

crainte de desplaire, ou autre regard,
tous en ont retiré leur pied. Et de ma
part ie ne pretendois l'entreprendre, ius-
ques à ce qu'une occasion, ainsi qu'un
violent tourbillon m'y ait emporte. C'est
que pour auoir discours de ceste que-
stion deuant un iuge signalé des doctes,
riches & acorts de sa prouince, il l'ap-
prouua avecques grande louange. Et
l'ayant recité à autres iuges douez des
mesmes ornements, partant m'astrai-
gnent, tant par prieres que serment de le
mettre par escrit. Voila pourquoy me
voyant de ce costé appuyé de si grands
personnages, il ne me restoit que d'estre
approuué de quelques Gouverneurs:
ausquels aussi ceste dispute s'adresse. En-
tre lesquels par sur plusieurs, i'ay esleu
monseigneur du Hallot pour luy dedier
cest oeuvre, pour le veoir reuestu des plus
dignes vertus qu'y doyuent reluire. Car
sil faut rechercher en eux une prudence
& grandeur de courage, combien en a-il

fait paroistre quād enuironné des Cau-
tiers, & des villes voisines qu'il auoit
ennemies, il les a tousiours brauez, les
battant en diuers lieux, sans se laisser en
ces trauaux. En imitant son Roy, &
corps superieurs qui paroissent en haut.
Voila pourquoy il ne s'est presque passé
combat ou il ne se soit trouué, suuy de
monsieur de Creuecœur son frere, ainsi
que fait Mercure le Soleil. Mais ce qu'il
le rend plus digne de gouuerner, c'est que
se conformât au Souuerain modérateur
de l'vniuers, qui par vne patience tres-
parfaite respād ses benedictions sur peu-
ples diuers, ou contraires de religion.
Aussi ce seigneur embrasse tous bons
François, sans s'arrester aux passions ou
plusieurs sur tel suiet se laissent empor-
ter, pour d'vn haut iugement cognoistre
que ces diuersitez ne procedent que de
leur instruction & nourriture: en la-
quelle la plusspart veut obstinément per-
seuerer, sans rien relascher pour s'accor-

der, ni vouloir mettre à la ballance les
raisons de leurs aduersaires. fmitans
des iuges qui ne vouldroyent ouir que
l'une des parties pour sententier. Mais
en ceste sagesse vous demonstrez estre
vray surgeon de Guy le Blond de Mōt-
morēci: lequel nourri en l'idolatrie Pa-
yenne, l'abandonna à la predication de
sainct Denys, se ioignant à Charles
Martel en la deffaitte des Sarrazins:
comme aussi de Matthieu de Montmo-
renci, lequel aussi vertueux qu'Epami-
nonde Tebain, esleua l'office de Conne-
stable au haut degré d'hōneur qu'elle oc-
cupe, lequel pour sa valeur espousa l'une
des trois filles du Conte de Hainaut, &
les Roys de Frāce, & Angleterre les au-
tres. Cestuy-ci fut suyui de Bouchard
de Montmorēci, esleu à la mesme digni-
té, parrain de Charles cinqüieme & de
Anne de Montmorenci, vostre cousin,
ayant d'un courage inuincible soustenu
les grandes armées de Charles le quint,

Empereur, des plus aduisez : sans m'ar-
rester aux hautes entreprises de ces hu-
mans & equitables Gouverneurs de
Paris & Languedoc, premiers Mares-
chaux de France, vos cousins, qui ont
toujours fait resistance aux perturba-
teurs du repos des François, transper-
cez d'extreme regret de veoir ainsi ruis-
seler leur sang aux batailles & massa-
cres, pour rassasier le cruel courage des
estrangers. Et pour faire fin, ie vous ay
voulu représenter comme vn pourtrait :
auquel il seroit à desirer que tous Gou-
verneurs se conformassent, ou par vne
bonne ialousie s'esuertuassent de sur-
monter, comme aussi pource qu'il est re-
quis vn courage tres-generoux & ma-
gnanime, tant pour maintenir l'au-
teur, que la doctrine qui est comprin-
se en ce liure. Surquoy ie supplieray ce-
luy qui preside sur ce monde vniuersel
qu'il vous accompagne toujours de son
Esprit de Force & Sageesse, afin que vos

actions puissent reussir à sa gloire, au-
gmentation de vostre maison, & plein
retablissement du regne de nostre Roy.
Par le vostre tres-humble seruiteur,
G. B. François Royal.

LIAT-



LIAISON DE CE TRAITE',
*avecques celuy du Royal François, de la subtilité
des Italiens.*

CONSIDERANT que la Repu-
blique Chrestienne est disposee à
vne subuersion entiere, à cause
des guerres intestines qui la de-
struisent, ou plusieurs recherchant des reme-
des n'y peuuent apporter que peu d'auance-
ment, pource qu'ils ne montent iusques aux
premieres causes qui enfantent de si deplora-
bles effects. C'est pourquoy m'estant desia
tant auancé que d'en auoir esclarci la princi-
pale, au traité de la subtilité des nations Me-
ridionales, qu'elle employent à l'euerfion des
Septentrionales, pour les iuger moins deliez
qu'ils ne sont. Je me suis proposé de represen-
ter vne autre seconde cause des defastres dont
la Chrestienté est bouleuersee, ainsi que par
vn grand deluge de maux, qui consiste au de-
uoir & rang qui doit estre obserué par l'Ec-
clesiastique, les Roys leurs gouuerneurs, &
magistrats, lequel estant à present renuersé,
& tout autre que le souuerain Monarque, le
droit de nature, celuy des gens y auoyent in-
uiolablement obserué par tant de siècles. L'on

doit tenir pour certain que de là nous decou-
lent ces torrens d'afflictions dont nous voy-
ons la Gaule couuerte. Et que autāt de temps
que l'ordre que chacun doit tenir en sa voca-
tion sera peruersti, telles miseres nous tallon-
neront tousiours, & nous priueront de la fe-
licité dont Dieu a beni les premiers siecles,
& dont s'esiouissent à present les peuples
mieux reiglez que nous.

*Briefue enumeration des argumens par lesquels
l'Ecclesiastique pretend tenir rang par
dessus toutes principautez
du monde.*

ET pour entrer à vn vray reſtabliſſement,
& tomber au nœud de ceſte queſtion de
la preference des Magiſtrats & Eccleſiaſti-
ques, ie representeray brièfuelement les plus
forts argumens dont chacun ſe fortifie, pour
entrer en combat, afin d'en remporter vne tri-
omphante victoire, ou ie feray marcher en
premier lieu ceux qui defendent le parti Ec-
cleſiaſtique, affectans le colloquer aux plus
hauts rengs des dignitez du monde, pour r'a-
ualler ſous ſes pieds tous Roys & Magiſtrats
qui ſouſtiennent qu'il occupe au corps myſti-
que de l'Egliſe & gouuernemens humains,
telle prerogatiue que doit auoir la raiſon qui
a ſon ſiege au cerueau, ſur la volonté & affe-
ctions qu'ils ont au cœur ſoubmis en leur in-
ferieur: Concludans qu'ainſi qu'elle a le gou-
uernement en l'homme bien reiglé, que tout

de mesme l'Ecclesiastique doit estre reuestu de commandement & superiorité sur toutes principautez terriennes. Et specialement le Pape, chef ministerial de l'Eglise, tenant le plus haut lieu: tant pour estre Lieutenant de Iesus Christ en terre, vray successeur de saint Pierre, sur lequel l'Eglise a esté edifiée, que en consideration de sa puissance, par laquelle il peut lier & deslier, sauuer & perdre ainsi qu'il luy plaist.

*Recueil des plus fortes raisons opposees pour la pre-
eminence des Magistrats par dessus tous
autres estats.*

D'Autre part ceux qui s'auancent pour de- fendre la dignité souuerainé des Roys & Magistrats, maintiennent qu'ils representent l'image de Dieu, qu'ils sont assis sur son siege, leur ayant assuietti tous autres estats, pour les reigler & reformer quand il y suruiendra abus. Les ayans à ceste cause reuestus de force pour les y renger, comme soubmis sous les cordeaux de leur puissance. Proposent aussi que leur dignité a esté de tout temps si fort engrauee en l'entendement humain, que l'on ne pourroit remarquer que iamais autre estat leur eust voulu faire teste pour s'y opposer. Et que Dieu, afin de les faire plus honorer les a anoblis des noms de sa diuinité, les employant à executer les plus hauts effects de sa puissance, denonçant que ceux qui s'esleuent contre-eux resistent à son ordonnance: dont

ils inferent que la dignité des Magistrats doit estre tenue pour supérieure au dessus de la vocation ecclesiastique.

Belle approbation de la dignité des Magistrats, en ce que le Createur du monde a le premier exercé ceste charge.

Gen. 3.
14.

Gen. 4. 9.

Gen. 5. 3.

O R pour resoudre ceste question ,il nous faut remarquer en premier lieu, qu'en ce conflict, ceux qui contendent demeurent d'accord que Dieu est auteur de l'une & l'autre vocation, donc faut resoudre qu'à luy appartient de disposer du rang que l'une doit auoir par dessus l'autre: veu que nul de ceux qui en debattent ne leur attribuent equalité. Quand pour l'antiquité de la vocation du Magistrat & de son origine, Moyse tesmoigne que Dieu incontinent aprez auoir basti cest vniuers, l'à le premier de tous dès le Paradis terrestre exercee, ayant fait le procez, & prononcé sentence de condamnation contre nos premiers parens, pour leur rebellion. Consequemment aprez qu'ils furent exilez de ce lieu, il s'en reuest contre Cain parricide, resignant telle autorité aux peres sur leur posterité. En les constituant magistrats & gouuerneurs sur leurs successeurs, ainsi qu'à esté Adam, source premiere du genre humain, Seth, Enoch, Noé, & les autres au parauant du deluge. Et du depuis Cam, Sem, & Iaphet, Abraham & Iacob, qui non seulement auoyent commandement sur leurs enfans, en

ce que concernoit la vie humaine: mais aussi pour leur donner instruction, en ce qui regardoit l'honneur de Dieu & exercice de sa Religion.

Comme Dieu pour honorer ceste vocation a luy mesme appellé le premier Magistrat de son Eglise.

MAis d'autant que l'Eternel par sa grande bonté, voulant se manifester plus amplement au peuple par luy esleu, luy donnant tesmoignage de sa presence, tant par miracles, deliurance de seruitude, publication de sa Loy, constitution du Tabernacle, que possession de la terre sainte: comme aussi en la separation des charges des Magistrats & Ecclesiastiques: afin que ceux qui y seroyent appelez les peussent mieux executer. Voila pourquoy ayant premierement appellé Moyse pour Magistrat, afin de produire par sa main les plus hauts & admirables exploits qui eussent esté veus par l'vniuers, il ne voulut employer aucun ministere humain en sa vocation, l'ayant de sa bouche sacrée immédiatement appellé du buisson ardent. Voulant par vne singulière prerogative honorer sa vocation, & la preferer à toutes autres. Et pour l'illustrer davantage, l'employe pour appeller Aaron en la sienne, pour luy faire cognoistre qu'il la tenoit de Moyse, ainsi que du Lieutenant de Dieu. Or est-il que l'un estoit appellé pour Magistrat, & l'autre Eccle-

Exod. 3.

2.

Exod. 3.

4.

fiastique. Parquoy le Souuerain aux personnes de ces deux freres, a voulu pourtraire comme en vn tableau la presceance & superiorité que doyuent tenir telles vocations l'une au dessus de l'autre, iusques à la consommation du monde, comme procedantes de celuy duquel, selon le tesmoignage de saint
Rom. 9. Paul, les dons & la vocation sont sans repentance.

*Description de la personne d'Aaron, & de
 l'excellence & splendeur de sa
 vocation.*

Gen. 4. 14 VOYONS partant quelle estoit la qualité d'iceux auant qu'ils fussent appelez, & ou Dieu les a employez du depuis, ou nous commencerons à Aaron, duquel nous lisons que Dieu l'auoit produit sur terre avec prerogative d'aisnesse, pour renger sous sa puissance Moysé son puisné, ainsi que Abel à Cain: l'ayant d'abondant enrichi de ce beau don d'eloquence dont Moysé n'estoit doué, il estoit choisi pour le souuerain Sacrificateur du peuple Saint: esleu pour estre la vraye figure de ce grand Sauueur du monde, de la bouche d'Aaron deuoit sortir la science: Il estoit appelle pour estre intercesseur entre Dieu & les douze lignees d'Israel, desquels il portoit les noms sur son estomach & espaulles, par ses sacrifices. Entant qu'ils representoyent celuy de Iesus Christ, les fideles obtenoyent remission de leurs pechez: estant re-

uestu d'accoustremens rres. precieux , par lesquels il estoit de beaucoup resplendissant par dessus les autres Sacrificateurs & Leuites : par la splendeur desquels Alexandre le grand allant pour ruiner Ierusalem , en fur retenu : comme voyant reluire quelque chose plus que humain en la personne de l'un des successeurs d'Aaron qui les portoit. Il n'y auoit que luy ou ceux qui luy succedoyent qui entraissent au Sanctuaire des Sanctuaires , ou Dieu faisoit souuent paroistre des signes de sa presence. Voila pourquoy il nous faut recognostre qu'Aaron a esté le premier & le plus digne & haut esleué : tant pour auoir esté le premier choisi à son office , que pour auoir porté la parole enuers Pharaon pour la deliurance des Israelites, que tous autres Ecclesiastiques , qui oncques ayent esté & seront iusques à la fin des siecles, & dernier periode du monde.

*Effects admirables de la puissance diuine pour
sanctifier Moyse & sa vocation, & l'es-
leuer par dessus tous les autres.*

Que si de là nous contemplons la qualité de Moyse auant qu'il fust Magistrat, il auoit souillé ses mains au meurtre d'un Egyptien, c'estoit vn banni du pays de sa naissance, priué de la compagnie de ses parens, r'abbaissé iusques là que d'estre pasteur de brebis, en la maison d'un estrangier. Cependant l'Eternel le voulant employer pour Gouver-

Exod. 2.

12.

- Exod. 3.* neur & Magistrat sur son peuple, luy appa-
I. roist, rayonnant de la splendeur lumineuse de
 sa Maiesié, luy demontrant des signes de sa
 présence, l'appellant pour Gouverneur & Li-
 berateur de son peuple, l'enuoyant en son
 nom pour affranchir les Israélites de leur
 grievue seruitude, l'employe comme instru-
 ment par luy choisi. pour desployer en Egy-
 pte les hauts effects de son admirable puissan-
 ce, tant en la manifestation des plus grands
 miracles qui eussent esté produits sur la face
 de l'vniuers, que aux grandes victoires dont
 il fnt l'executeur sur les Chananeens. Par la
 presence de ce Gouverneur la mer rouge s'ou-
 ure, pour luy donner passage: Elle retourne
 en sa place pour ruiner son ennemi & son ar-
 mee. Et afin d'esleuer la vocation de Moysé
 au plus haut comble d'honneur, le Souuerain
 ordonne qu'il sera pour Dieu à Aaron, &
Exod. 4. Aaron luy sera pour bouche: le denommant
I 6. en tous lieux premier qu'Aaron: lequel de sa
Exod. 5. part recognoissant vne si grande prerogatiue
I. en la charge de Moysé par dessus la sienne,
 s'abbaisse iusques là qu'au lieu de l'appeller
 son frere, de le nommer son Seigneur, en o-
 beissant à ses commandemens en toute reue-
 rence. Et suyuant cela, non seulement les dou-
 ze lignees luy deferoient toute prerogatiue
 par dessus Aaron: mais aussi les Egyptiens
 mesmes qu'il auoit frappez de tant de fleaux,
Epiphani. le recognoissoient du nombre de leurs
lib. 3. He- dieux, & la fille de Pharaon qui l'auoit nour-
reseon. ri pour deesse, qui est vne belle instruction

9
aux Ecclesiastiques de s'assubiection à son exemple enuers tous Magistrats & Gouverneurs.

*Singuliere prerogative de Dieu enuers Moÿse,
l'ayant seul fait monter à luy pour bail-
ler par sa main la loy morale, iu-
diciaire & ceremoniale.*

MAis afin d'amener plus grande confirmation en cela, representons quel a esté tour le cours de leur vie, ou nous trouuerons que Dieu n'a moins anobli & illustré la personne de Moÿse, & sa charge par dessus celle d'Aaron, qu'il a esleué le corps du Soleil, & ses grands effects, par dessus ceux de la Lune, donnant tousiours le commandement à Moÿse sur Aaron. Et pour honorer d'auantage sa charge le constitue Intercesseur entre luy & les Egyptiens, ne repoussant ses prieres, pour faire cesser les fleaux d'Egypte. Faisant monter Moÿse au mont de Sinay, en sa lumiere inaccessible, il laisse Aaron avecques septante anciens du peuple en arriere, pour le rendre participant de sa resplendissante lumiere, & de l'Empire qui luy appartient sur son peculier peuple. Mais quand par sa main il presente ceste loy Morale, contenue aux dix Commandemens, qui doit estre tant que le monde durera, perdurable. Et qui plus est, la Loy Iudiciaire, plus amplement descrite aux liures de la Loy. Comme aussi la Loy Ceremoniale, qui sembloit n'appartenir en

Exod. 8.

5.

Exod. 24

2.

Exod. 10

18

rien à la charge du Magistrat, en delaisant Aaron: Comme aussi en la constitution du Tabernacle, & Arche d'alliance, du Propitiatoire, des pains de Proposition, il n'est possible de pouoir remarquer arguments plus forts d'une sainte vocation que de sa preference.

*Moyse employé par l'Eternel pour prescrire la
forme de luy sacrifier, & des accou-
stremens des Sacrifi-
cateurs.*

MAis ce qui est le plus considerable aux
Exod. 25 operations du Treshaut, c'est que quand
 il constitue l'ordre de faire les sacrifices, qui
 appartenoyent du tout à la charge d'Aaron,
Exod. 26 Dieu ne le veut reuestir de tant d'honneur
 que de l'appeller en la montagne pour luy
Exod. 27 monstrier le pourtrait: ne l'instruire de la rei-
 gle qu'il y deuoit obseruer: mais luy en or-
 donne l'usage, ainsi que des autres offices des
 Sacrificateurs, & de leurs vtenfiles & instru-
 mens par la main de son Magistrat Moyse, par
 lequel il pourueoit mesme iusques aux ac-
 coustremens d'Aaron, que autres Sacrifica-
 teurs & Leuites. Et qui plus est, c'est par luy
 qu'ils sont oingts & consacrez en leurs char-
 ges, pour faire paroistre non seulement aux
 Israélites, mais aussi à tous peuples, que Dieu
 a reuestu ceux qu'il esleue pour Gouver-
 neurs & Magistrats, d'une vocation tres-sain-
 cte, (& non Laicque, ou Profane, comme la

pluspart la reputent aujourd'huy) en ce que non seulement il les a consacrez comme instrumens de sa puissance, pour introduire Loix & Ordonnances, en ce que touche les mœurs & iugemens terrestres : mais aussi au Gouvernement & administration des choses les plus sainctes. Qui fait preuue tres-claire que leurs charges sont autant ou plus sainctes & sacrees deuant Dieu, que celles des Ecclesiastiques.

*Rayons de la lumiere diuine en la face de Moÿse,
tesmoignages qu'il representoit en sa
charge la personne de Dieu, &
que ses loix sont du tout
diuines.*

ET de fait, le Tout-puissant, pour approbation de cela, imprima vne telle splendeur & maïesté estincelante en la face de Moÿse, que les Israëlites ne la pouuoient porter : L'ayant en outre, decoré d'un honneur si rare, que d'estre Intercesseur entre luy & son peuple : ou encores les Roys de France sont veus participer aucunement, en la guarison des Escroüelles, quand le souuerain Medecin veut en leurs personnes y desployer sa puissance, reuestant leur Maïesté ainsi que de leurs semblables, qu'il esleue aux plus hauts rangs des Magistrats, d'une Maïesté & splendeur plus grande qu'elle n'apparoist aux Ecclesiastiques, tant se soyent-ils haut esleuez, pour monstrier que c'est confondre ciel

Exod. 29

Exod. 34

29.

& terre, & renuerfer tout ordre humain, de
 vouloir à present colloquer les Pasteurs sur
 des Throſnes, leur impoſant des Couronnes,
 & en les eſleuant r'aualler les Magiſtrats &
 Gouverneurs à leurs pieds: comme eſtans
 prophanes & inferieurs d'eux, contreuenans
 directement à l'exemple du premier Pasteur
 Aaron, appellant Moÿſe ſon ſeigneur: Et au
Jerem. 27 Prophete Ieremie, lequel adreſſant ſa paro-
 le à Sedecias, l'appelloit ô Roy, Monſei-
 gneur.

*Comme le Fils de Dieu ayant exercé l'une &
 l'autre charge, a pourtrait la forme
 comme elles doyuent eſtre
 exercees.*

Eſaye 6. Mais par quel moyen auroit la Sageſſe
 Eternelle peu eſleuer en plus haut degré
 d'honneur de ſaincteté la charge des Magi-
 ſtrats, qu'en la voulant exercer, luy-meſme
 pour punir la deſobeiſſance & ingratitude de
 ſon peuple, quand il apparoiſt en ſon Temple
 à Iſaye le Prophete, ſeant ſur vn ſiege haut
 eſleué, les rayons duquel rempliſſoyent le
 Temple, par la Maieſté duquel ſes grands po-
 ſteaux furent eſmeus, le Prophete accablé par
 terre, ne pouuant ſouſtenir vne gloire ſi gran-
 de: Laquelle meſme les Seraphins ne pou-
 uans porter, couuroyent leurs faces, crians,
 Sainct, Sainct eſt le Seigneur des armées,
 Toute la terre eſt remplie de ſa gloire. Or c'e-
 ſtoit Ieſus Chriſt, comme teſmoigne Sainct

Iean, qui vouloit exercer sa charge de Iuge, Iean 12.
 lequel quand il est venu au monde pour estre
 le souuerain pasteur de son Eglise, il a tenu
 cachee ceste sienne Maiesté, s'estant repre-
 senté en forme de seruiteur, & fils putatif
 d'un charpentier, pour y estre comme le mes-
 pris & contemnement du monde. Voulant
 par là pourtraire comme en vn Tableau la
 gloire des Magistrats de la terre, & l'humilité
 & petitesse des Pasteurs, pour les rendre ses
 imitateurs. Suyuant cela, Dauid parlant de
 son fils le Roy Salomon: disoit, qu'il auoit e-
 sté assis sur le siege du Seigneur: d'autant que 1. Chron. 22.
 les Roys ne regnent que par luy, & pour luy,
 comme ses Lieutenans, dont on peut inferer
 que, comme Dieu est la sainteté mesme, que
 aussi l'estat qui approche le plus prez de sa
 charge, est plus saint que nul autre. Au mo-
 yen dequoy c'est trop mesprisé vne vocation
 si sainte, que de l'auoir tenue puis quelque
 temps pour prophane, & nous faut croire que
 comme Dieu a le souuerain commandement
 sur toutes creatures, soyent celestes ou terre-
 stres, aussi doit auoir le Magistrat sur rous
 autres estats. De sorte que qui leur résiste, ne Rom. 13.
 s'oppose pas seulement aux hommes, mais à
 l'Eternel & à son ordonnance.

*Continuation des effets de la puissance diuine
sur Iosué, & de l'honneur que Dieu
luy fait ayant succédé à
la charge de
Moyse.*

ET pour monstrier qu'une si haute prerogative, de laquelle le Dieu d'Israel voulut honorer Moyse, n'estoit attachee à sa personne, mais à l'office auquel Dieu l'auoit appelé, il voulut aprez son trespas reuestir Iosué, l'ayant constitué en son lieu, de pareille preeminence, le faisant approcher de luy pour luy reueler sa volonté, ainsi qu'à l'endroit de son maistre Moyse, l'establisant Intercesseur entre luy & son peuple, exauçant ses prieres ainsi que celles de Moyse. Ce que considerant Eleazar grand Sacrificateur, fils & successeur d'Aaron, luy porte obeissance, execute ses commandemens, combien qu'il ne fust auparauant que seruiteur de son oncle, frere puisné d'Aaron, Ayant esgard à la dignité ou Dieu l'auoit esleué. Et de la part de l'Eternel. afin d'autoriser sa vocation, à sa priere il arreste le cours du Soleil & de la Lune, Les murs de Iericho se renuerserent par terre. C'est luy qu'il employe pour faire lecture de sa Loy à tout le peuple, aux femmes & enfans: Par luy il tire la promesse de l'observation d'icelle. C'est celuy par lequel Dieu fait faire de grandes exhortations aux Israelites de demeurer en l'obeissance de leur Redempteur. En quoy apparoit que ce que

Is. 10.

Is. 8.

Is. 24.

Dieu le preferoit aux exploits de si hautes charges. Laisant Eleazar en arriere, il a voulu monstrier la preference de la dignité des Magistrats, & la grande saincteté de leur charge, & qu'ils doyent mesme preferer quand il faut establir le seruice de Dieu par dessus les Ecclesiastiques.

*Les Magistrats doyent tousiours preferer aux
œuvres les plus signalees pour l'esta-
blissement du seruice
diuin.*

ET pour leuer toute doute sur ce point, si nous regardons aux effects plus remarquables que Dieu a voulu faire paroistre en ce peuple, il y a tousiours employé ses Magistrats. Quand il a ordonné que l'Arche d'alliance fust transportee en Ierusalem, le Roy Dauid en auoit la conduite. C'estoit luy qui ^{2. Sam. 12.} establist l'ordre obserué entre les Sacrificateurs. Salomon, successeur en sa charge, bastit ce Temple admirable de Ierusalem, & non les Sacrificateurs. Ce mesme Roy fist la priere pour la dedicace du Temple, & non les ^{1. Rois 8.} Prestres de la Loy. Presenta oraisons au Tout-puissant pour le prier d'exaucer les oraisons qui y feroient faites: Interceda enuers luy qu'il pardonnast les pechez de ceux qui prieroyent dedans le Temple: il sacrifia les pacifiques: offre vingtdeux mille bœufs en sacrifice. Le Roy Iosias est employé pour lire la Loy de Dieu au peuple, & tirer pro-

messe de l'observer. Cela partant nous doit apprendre que la vocation des Rois & Magistrats est autant ou plus sainte que celle des Pasteurs, comme ayans esté preferez de Dieu en œuvres si saintes, & que ceux qui les veulent tant abbaïsser que de les rendre inférieurs aux Pasteurs Ecclesiastiques, ont conspiré de pervertir tout ordre humain, observé non seulement entre le peuple de Dieu, mais aussi entre toutes les dominations du monde.

*Confirmation de ce que dessus en ce que les Payens
n'ayans que la lumiere naturelle, ont pratiqué les mesmes
choses.*

ET pour le faire ainsi paroistre, si nous voulons monter iusques à la premiere Monarchie Assyrienne, en laquelle Nabuchodonosor voulut faire esleuer sa grande statuë de fin or pour la faire adorer de tous peuples, enclos aux limites de sa Monarchie. Tout y est conduit par son autorité, sans que celle des prestres y interuienne. Quand son grand Empire est renuersé par Cyrus Roy des Perles, ayant basti vne autre Monarchie, y auoit-il de ce temps des Ecclesiastiques si insolens que d'entreprendre aucune preference sur luy? Et qui eust esté le Pasteur si temeraire qui eust voulu prendre la presceance au deuant de ce grand Alexandre? Et quand pour l'Empire Romain, qui eust esté le Prestre tant hors
du

du sens, que d'entreprendre de r'aualler vn
 Auguste Cesar, vn Tybere, vn Constantin le
 Grand, vn Charlemagne, au de lous de luy?
 Au temps de Tybere, estoit le Dieu Eternel
 reuestu de la nature humaine, le Sacrificateur
 Eternel selon l'ordre de Melchisedec: auquel
 toutes creatures, tant celestes que terrestres,
 doyuent hommage & reuerence. Estoit aussi
 son Precurseur saint Iean, participant plus
 du ciel que de la terre. Mais tant s'en faut que
 ils pretendissent s'emparer de quelque pre-
 sence, ne prendre rang deuant les Magi-
 strats: que au contraire ils s'assubiection-
 nent, non seulement aux Empereurs, mais qui
 moins est, à leurs moindres Gouverneurs, en
 toute humilité & reuerence, pour obseruer
 l'ordre, que le Fils de Dieu qui a créé les
 Principautez & puissances, y auoit luy mesme
 de tout temps establi, donc nous faut conclu-
 re que c'est vne doctrine nouuelle, renuer-
 sant l'usage obserué aux premiers aages, que
 d'esleuer les Pasteurs au dessus des Magi-
 strats, quand on leur attribue la preference,
 comme donnant le premier estat. Ce qui pro-
 duit en eux vne peste d'ambition: laquelle
 sur tous autres estats ils doyuent fuir & dete-
 ster.

*Comme les Magistrats sons ordonnez de Dieu
pour restablir son seruice de la corruption
des Pasteurs, & des calamitez
qui arriueront quand ils
vsurperont son
lieu.*

OR combien que par ce que dessus, la pre-
eminence magistrale soit assez patente
deuant la face de tous hommes, si est ce que
pour l'honorer dauantage, il ne nous faut ob-
mettre que non seulement le Souuerain l'a
employee en l'establissement des plus belles
& sainctes operations du monde: mais aussi
au restablissement & reformation des abus
& corruptions, auxquels Satan a donné entree
par la main des Pasteurs. Ou ce grand Aaron
marchera deuant comme porte-Enseigne: le-
quel outrepassant les bornes de sa vocation,
se laisse emporter iusques là que d'eriger vn
veau d'or au desert, comme memorial ou ga-
ge de la deliurance d'Egypte: lequel estant
receu sans contredit de plus de trois cents
mil hommes, croyans que cest ouurage fe-
roit d'aussi bonne odeur deuant Dieu, qu'il
estoit à leurs yeux plaissant & delectable. Ne
produit toutesfois autres effectz qu'un em-
brasement de l'ire Diuine, pour du tout les
ruiner & destruire. Pour correction duquel
crime, le Seigneur enflamme vn iuste cour-
roux en l'entendement de son Magistrat
Moyse, poussé duquel, il brise les Tables de
la Loy, reçoit commandement de mettre à

mort les adorateurs de ce veau: Tellement
que pour appaiser l'ire de Dieu trois mille
sont exterminés, & par son intercession est
preservé l'outreplus de ce peuple. En quoy
l'Eternel voulut donner enseignement à tous
les siècles aduenir, & pourtraire comme en
vn tableau sur ce globe terrestre, que autant
de fois que l'Ecclesiastique se mettra en a-
uant pour produire ses inuentions, ou faire re-
cevoir quelques loix, encores que ce soit a-
uecques vne apparence de la plus grande sa-
gesse qu'on puisse remarquer, & avecques vn
applaudissement de tous. Si est-ce que pour-
rauir l'autorité qui appartient aux Roys &
Magistrats, tout cela n'apportera qu'un em-
brasement de l'ire diuine sur son Eglise, & ne
produira en fin que disputes, haines, diuisions
& querelles: & non seulement pour vne aage,
mais aussi iusques à la dernière consumma-
tion du monde.

Ex. od 32

*Exemples de la faueur de Dieu quand les Pasteurs
se sont contenus aux limites de leurs char-
gés, & de son ire quand ils s'en
sont destournez.*

ET pour confirmation de ceste doctrine, si
nous contemplons curieusement la pro-
messe faite par l'Eternel: disant, Si vous che-
minez selon mes Commandemens, sans vous
en destourner à dextre ny à senestre, Je ren-
dray vostre terre fertile, & vous donneray vi-
ctoires sur vos ennemis. De sorte qu'un cent

d'entre vous en pourfuyura dix mille. Ce que
 ayant le Sacrificateur Eleazar, fils d'Aaron,
 exactement obserué, il a veu reussir vn plain
 accomplissement de si belles promesses, par-
 quoy son aage fut rempli de tout heur & feli-
 cité. Mais Israel est-il priué de ce saint per-
 sonnage? voici ses successeurs qui excogitent
 ou donnent entree à nouueaux seruices: com-
 me vn des Sacrificateurs à l'idole de Michas,
 les autres seruent à l'image de Baal, & d'Asta-
 rotor. A cause dequoy l'ire vengeresse du Sou-
 uerain s'enflamme sur son peuple, l'expose en
 proye à ses ennemis. Quoy voyant il pleure
 son peché, & crie à Dieu, qui exauçant sa pri-
 ere, suscite des Iuges pour le restablir en li-
 berté, & remettre le vray vsage de sa Loy. Du
 nombre desquels Magistrats fut Othoniel,
 par la main duquel Dieu deliura son peuple
 de la seruitude ou il estoit trebusché, à cause
 de la corruption de son seruice, que par mes-
 me moyen il restitua en sa pureté. Ce Iuge
 estant mort, les Prestres destournent dere-
 chef le peuple aprez les seruices humains,
 dont il reçoit pareil chastiment: il pleute
 son peché deuant Dieu, qui suscita Aod Iuge,
 pour son Libérateur, & reformateur de son
 seruice. Ce peuple trebusche derechef, aprez
 la mort de ce Iuge, Dieu l'abandonne à la
 merci de ses ennemis: il crie derechef, & pleu-
 re son peché, Dieu suscite l'vne fois Debora
 pour l'en deliurer, & l'autre fois Gedeon.
 Aprez la mort desquels il s'est derechef de-
 stourné par ces Pasteurs de la Loy de Dieu,

qui le liure en proye: dont il est derechef deli-
uré par son Iuge Iephthé: & à l'autre fois par *Iug. 6.*
Sanfon, & tout de mesme par Samuel, autre
Iuge. En quoy apparoit, que tout ainsi que *Iug. 7.*
le veau d'or produit par Aaron, n'engendra
que meurtre & effusion de sang, & que les in-
ventions de ses successeurs, n'amassèrent que
deplorables calamitez sur le peuple, quoy
qu'elles ne manquassent d'un beau lustre de
sagesse humaine. Que tout de mesme comme
le Pere tout puissant n'a voulu employer
que le Magistrat pour mettre en avant sa
Loy: aussi quand il a voulu restablir & repur-
ger son Eglise des fausses doctrines des Pa-
stours, c'a esté par le mesme. Cela suffise pour
le regard des Iuges.

*Probation que Dieu a employé seulement les
Rois & Iuges pour la reformation de
son service & correction
des Pasteurs.*

Que si de là nous descendons au temps
des Rois qui leur ont succédé, nous
trouverons que du temps du Roy Achab, &
de Iezabel, les Prestres & Sacrificateurs ay-
ans destourné le peuple de Dieu aux Sacrifi-
ces des Gentils, furent conuaincus de men-
songe par le Prophete Helye, à cause dequoy *1. Rois*
on les fait mettre à mort. Pareillement du *18.*
temps du Roy Ezechias, le peuple de Dieu
fessant destourné à idolatrie, en abusant du *2. Rois*
Serpent d'airain, Dieu se sert de luy pour *18.*

l'abbatre & briser, en reſta-bliffant ſon ſerui-
 ce. Duquel ſeſtant derechef le peuple de-
 ſtourné, il employe le Roy Iofias, pour rui-
 ner l'idolatrie que les Paſteurs ſouffroyent
 entre le peuple. C'eſt pourquoy le Prophete
 Jeremie diſoit, Tous les habitans du monde
 n'euffent iamais creu que l'ennemy fuſt entré
 par les portes de Ieruſalem: Mais pour les pe-
 chez de ſes Preſtres; & l'iniquité de ſes Sacri-
 ficateurs, lesquelſ ont eſpandu le ſang des iu-
 ſtes, Cela eſt aduenu. C'eſt pourquoy Eze-
 chiel prononçoit malediction ſur les Paſteurs
 d'Iſrael, qui ſe paſſent eux-mesmes. Et que
 Zacharie proferoit ces termes, au nom du
 Dieu viuant, Mon ire eſt embrasée contre tes
 Paſteurs, & feray viſitation ſur les boucs. Et
 que Ieſus Chriſt meſme prononçoit plu-
 ſieurs maledictions ſur les Scribes & Phari-
 ſiens: & qu'il les appelloit aueugles, condu-
 cteurs d'aueugles. Suyuant cela, quand il luy
 a pleu du depuis ſon Aſcenſion eſtablir la pu-
 reté de ſon ſeruiſe par l'vniuers, il ſeſt ſerui
 du ſacré Conſtantin, & de ſon autorité, pour
 reformer les Paſteurs, renuerſer leurs faux
 ſeruices, & revnir la Chreſtienté, qu'ils a-
 uoyent entierement diuiſee. Et en la primiti-
 ue Eglise, en laquelle les Empereurs & Roys
 interpoſoyent leur autorité, ſur tout ce qui
 eſtoit à reigler. Comme Conſtantius Empe-
 reur, voyant que Felix Eueſque de Rome;
 par ſon outrecuidance ſeſtre tant adnancé
 que de l'auoir déclaré heretique, luy fait
 trencher la teſte, & en conſtitue vn autre en

son lieu. En l'annee trois cents soixante & sept de la mort de nostre Seigneur Iesus Christ, L'Empereur Constantin vsant de pareille puissance, enuoya en l'an fix cents quarante deux, le Pape Martin en exil, pour ses mauuais comportemens. Iean Pape douzieme fut par le grand Empereur Othon, depose pour ses cruautez & paillardises. Et outre, durant le regne de ce grand Empereur, qui estoit en l'an neuf cents soixante & vn, Benoist Pape, fut condamné à estre emprisonné, & estranglé. Pour demonstrier que quand Dieu a voulu purger son Eglise du desbordement des Pasteurs, c'a esté par la main de ses Magistrats. Nous voulant apprendre qu'il ne nous faut attendre reformation que de leur part: Comme estant le propre des Ecclesiastiques, que s'estans vne fois destournez de la pureté du seruice diuin, de se foruoyer tousiours de mal en pis, par vne certaine malediction de Dieu, qui les poursuit quand ils entreprennent outre la commission qu'il leur a prescrite, pour vsurper la preeminence dont il a voulu honorer ses Magistrats.

*Voyez la
mer des hi-
stoires.*

L'origine & le temps de la grandeur de l'Ecclesiastique, par qui & pour quelles causes il fut si haut esleué.

IL me semble, par ce que dessus, auoir clairement fait paroistre, que ce grand & saint modérateur de l'vniuers, qui a donné estre à toutes choses, qui les conserue par vne iustice

& ordre admirable, est l'auteur qui a institué les Magistrats, pour participer à la domination & seigneurie qu'il a sur les viuans, les ayant establis sur son siege, comme ses Lieutenans. Parquoy il est à present temps d'enseigner, tant l'auteur, que le temps auquel l'Ecclesiastique de son humilité & petitesse, a tant gagné sur les Gouverneurs du monde, que s'estant esleué par dessus eux, il les a tant rabbaissés, qu'il leur a fait croire qu'il estoit leur supérieur. Or si nous recherchons l'origine d'un tel desordre, nous trouuerons que l'Empereur Focas, & Boniface quatrième de ce nom, Euesque de Rome, viuant en l'an six cents & huit, apres nostre Seigneur Iesus Christ, ont produit ceste confusion, Et ce qui les y a attirés, c'est que Phocas, Empereur, ayant cruellement meurtri l'Empereur son seigneur, qui de rien l'auoit esleué aux plus grandes charges & dignitez de son Empire, pour s'inuestir de sa dignité, comme le plus villain, traistre & ingrat, que iamais la terre ait soustenu, à cause dequoy voyant l'ire vengeresse de Dieu, luy naurer la conscience, le ciel courroucé contre luy, les elemens desplaisans de conseruer ce monstre: lequel ne pouuant apprehender la grace de Dieu, pour un forfait si execrable, a recours à l'Euesque de Rome, & aux Ecclesiastiques, pensant que par leurs œuvres il pourroit obtenir misericorde: comme si Dieu, iugeant le monde, ne rendoit pas à chacun selon ses œuvres, mais selon celles d'autrui, contre son expresse pa-

*Voyez la
mer des
histoires,
& l'hi-
stoire Ec-
clesiasti-
que.*

role. Voila pourquoy voulant gratifier l'Ecclesiastique, & considerant la nature ambitieuse de Boniface, il esleua l'Eglise Romaine, dont il estoit Euesque; pour la premiere: & le declare Chef & Euesque vniuersel de toutes les Eglises du monde. Mais pour cela il n'euade d'estre meurtri ainsi qu'il auoit fait. Depuis lequel temps, ses successeurs ne s'arrestans à telle preference sur le Clergé, l'ont voulu amplifier & étendre sur Empires, & Royaumes, de quelque grandeur que ils ayent esté. Et pour y preparer la voye, n'ont rien eu en si grande affection, que de susciter guerres entre-eux, & les affoiblir de toutes parts: pour mieux faire resplendir la grandeur des Ecclesiastiques, pour atteindre ce point, que non seulement le Pape tint lieu au dessus des Roys & Empereurs: mais aussi les simples Euesques obtinssent la preference au dessus des Iuges & Gouverneurs. C'est pourquoy en l'an 1208. Innocent, Pape, attribuant superiorité par dessus Othon, defend que nul ne l'appellast Empereur, & luy portast obeissance: l'excommunie, & ceux qui le recognoistroient tel, parquoy il est abandonné de ses subiects, & met Federic en sa place. Et à son exemple ses successeurs ont iniustement fait rair le Royaume de Nauarre, festans en fin emparez d'une si desreiglee authorité, qu'il n'y a Puissance si haute, Conciles si grands, qu'ils ne se soyent soubmis en leur puissance, pour les corriger ainsi que bon leur semble. Suyuant cela, au lieu que

les freres Mineurs, se conformans à Iesus Christ, & ses Apostres, meritent estre celebrez de grandes louanges, d'auoir maintenu que le Pape, ny Euesques, ne deuoyent auoir domination, ne seigneurie en terre, & se deuoyent arrester au seul vsage de ce qu'ils possedoyent, ainsi que les Apostres. Ils en furent en l'an 1327. condamnez comme heretiques, par le Pape Iean. Et aussi le Pape Celestin, participant du ciel, contraire aux autres, ayant ordonné que les Cardinaux ne monteroyent sur cheuaux ne mulles: ains se contenteroyent a des asnes, ainsi que Iesus Christ: fut, par la piperie de Benoist son successeur, tressubtilement depossédé. Que si tels commencemens ont esté fort estranges, les aduancemens ont fait voye aux Turcs de s'emparrer de l'Empire de Constantinople, avecques horribles carnages des Chrestiens, à cause de la diuision procedee du prodigieux accroissement de leurs Euesques. Et depuis cent ans, pour ce mesme suiet l'on a veu le sang Chrestien ruisseler en plus de vingt batailles, sans parler des massacres faits par les villes, que meurtres des particuliers, enfondremens de maisons, que rauissement de biens, qui nous deuroit faire cognoistre par experience, que tout ce que les Pasteurs introduiront en l'Eglise du Dieu viuant, n'engendrera que mesmes & aussi deplorables effects, qu'auoit produits le veau d'Aaron.

*La grande difficulté qu'il y a à renger l'Eccle-
siastique en son ordre, avecques les
prodigieux effects de son
accroissement.*

OR combien que par ce que dessus, l'homme qui se laisse emporter à vne bonne raison, soit assez instruit du rang superieur des Magistrats, tant y a que pour auoir esté l'Ecclesiastique par cy deuant reuestu d'un si grand pouuoir que de faire croire à la plupart tout ce qu'il vouloit leur suggerer, que pour pouuoir à present se preualloir de prescriptions plus que centenaires à occuper les plus hauts & souuerains rangs d'honneur qui soyent au monde, aprez en auoir deietté ces grands Empereurs Romains, & autres Roys de la terre, qu'ils ont humiliez si bas qu'ils ne tiennent que rang de Fils à l'endroit du Pape : duquel en signe de grande humilité, ils ne desdaignent de baiser la pantoufle. S'estant vn Empereur abbaissé iusques là que de s'estre laissé mettre sous ses pieds, pour luy marcher sur la gorge, ainsi qu'à vn Serpent ou Basilic. Et aussi qu'une coustume desia tant inueterée a vne tres-puissante force, pour emporter les hommes qui l'ont vne fois receuë de son costé. Voila pourquoy pour releuer les Magistrats d'une si grande cheute, il est tres-necessaire fortifier leur cause d'autres argumens, pour extirper l'erreur qui a fait glisser tout ce grand desordre, veu qu'il y est obstineement defendu de grande partie des Pasteurs.

*Argumens pour r'abbaisser les pasteurs, tirez de
leurs noms, de la definition qui leur com-
pete de l'autorité de Christ
& de son exemple.*

PRemierement, ie viendray au nom que l'Escriture sainte leur attribue, lequel conuient souuent à la charge ou Dieu appelle les hommes, comme celuy de Iesus, d'autant qu'il estoit le sauueur. Et de Christ, pource qu'il estoit l'Oingt du Pere. Semblablement les Pasteurs, qui ont esté appelez aux plus belles charges, au regne de Iesus Christ, sont nommez Seruiteurs, ou Ministres: ainsi que Iosué estant l'une fois appelé Ministre, l'autre fois seruiteur de Moyse. Comme estans termes synonymes, signifians en Grec autant que *DOVLOS*, ou *DIACONOS*. Et sont personnes separees par la vocation de Dieu, pour publier l'Euangile: afin que ceux qui les receurent soyent sauuez, & ceux qui n'y croiront condamnez. Ceste definition est prise de saint Paul aux Romains, & de l'Euangile selon saint Marc, où il n'est fait mention de superioritez, Principantes, ny puissances terriennes, ne qu'ils soyent appelez pour Dominateurs, Gouverneurs, ne Legislateurs: Mais sont plustost, ainsi que par des barrieres, arrestez à la predication de l'Euangile. Et aussi comme pourroyent les regnes terriens leur conuenir, veu que leur Souuerain Chef parlant de luy, tesmoignoit que son regne n'estoit point de ce monde. Et parlant

Rom. 1.

Marc 16.

Iéan 18.

de sa vocation, enseignoit qu'il n'estoit point venu pour estre serui, mais pour servir: & donner son ame pour le prix de la Redemption de plusieurs. Et pour elucider que cela appartenoit aussi bien à ses Apostres, il leur disoit, Vous m'appellez Maistre, & vous faites bien; Mais il ne faut pas que le disciple s'esleue par dessus le maistre, ni le seruiteur aussi: Il suffit qu'ils soyent comme leurs maistres. Si donc la Parole eternelle, source de toutes dominations, viuiifiant toutes choses, n'a iustement attribué à sa vocation autre dignité que de servir, Faut-il à present que ceux qui confessent estre ses disciples & seruiteurs, s'enflent d'un si haut orgueil, que de prétendre ainsi que Lucifer, ou Adam, aspirer d'estre semblables au Pere souuerain, pour regner ainsi que luy, par ordonnances sur son Eglise? Veu que ce grand Precurſeur de Iesus Christ: duquel il a rendu tesmoignage, qu'il n'en estoit encores nay vn plus grand entre ceux qui sont nais de femmes. Confessoit deuant tous qu'il n'estoit digne de deslier la courroye du foullier du Redempteur, pour approbation de sa tres-grande humilité. Et par quel moyen auroit peu le mesme Fils de Dieu, mieux représenter la sienne, qu'en appellant les pourès ses freres, lauant les pieds de ses disciples: Et que baisant Iudas, lors qu'il l'alloit trahir. N'estant monté que sur vn asne, en faisant son entrée en Ierusalem: Et qu'en se soumettant au iugement de Pilate, sans decliner sa Iurisdiction, ainsi que l'Eccle-

Iean 13

Matth.

10.

Marc 10

Luc 3.

Matth.

26.

Iean 13.

fiastique de ce temps, brauant & triomphant
des Principautez de l'Europe.

*Représentation de la grande alteration qui pos-
sede les Pasteurs à aspirer aux gran-
deurs du monde, en la person-
ne d'aucuns des Apo-
stres.*

QVe si d'autre costé nous regardons de
quelles passions estoient transportez
ses disciples auant son Ascension, & que d'v-
ne grace speciale il les eust comme refondus,
& remplis de son Esprit: nous n'y apperce-
urons que des affections ambitieuses d'estre
esleuez aux grandeurs du monde, & des de-
sirs plus desreiglez à qui prefereroit l'un l'au-
tre, qu'il n'y a mesmes entre des courtisans:
Car encores qu'ils contemplassent ceste gran-
de & parfaite humilité de leur maistre, si est-
ce qu'en son absence, c'estoit leur principale
dispute, que sur leurs preferences. A cause
dequoy la mere mesme des fils de Zebedee,
des plus excellents Apostres, est par eux su-
scitee, pour requerir que l'un fust assis à la
dextre & l'autre à la fenestre de leur maistre:
dequoy les autres sont enflammez d'une for-
te ialousie & despit. Mais quelle medecine
leur donne leur maistre pour les purger d'v-
ne si vehemente ambition? Vous sçauiez (dit-
il) que les Princes des peuples dominant sur
eux: mais il ne sera pas ainsi de vous, Car qui-
conque voudra estre fait grand entre vous

Math.

20.

Marc 9.

qu'il soit vostre inferieur: & quiconque voudra estre maistre, qu'il soit vostre seruiteur. Or en cela la sagesse eternelle nous a voulu pourtraire, quelle sera la condition de beaucoup des plus apparens Pasteurs de son Eglise, iusques au dernier periode du monde. C'est qu'ils ne courront à rien de plus grande affection, qu'à s'emparer des presceances & dominations humaines. Mais neantmoins que de la part de ceux qui desirent adiouster foy à ces paroles, ils doyuent tenir pour les plus grands Ecclesiastiques, ceux qui fuyans toute grandeur mondaine desireront se parer de la robbe d'humilité, plus resplendissante en vn Pasteur deuant Dieu & ses Anges, que nul pourpre, ni pierrerie qui soit. Comme d'autre costé ceux, qui transportez de passions ambitieuses, aspireront tenir les plus hauts rangs d'honneur, pour les plus abiects & inferieurs: comme despouillez de la premiere vertu Chrestienne. Suyuant cela, aprez que le Fils de Dieu eut redargué les Scribes & Pharisiens de ce qu'ils affectoyent les premieres places à table, & premiers sieges aux assemblees: & estre appelez Maistres, Instruisoit ses disciples à ne leur ressembler, & qu'ils estoient tous freres: entre lesquels le plus grand deuoit seruir aux autres. Prononçant ceste sentence, que celuy qui s'esleueroit seroit abbaissé, & qui s'abbaisseroit seroit esleué: ou condamnant les Pasteurs affectans les presceances, il iugeoit qu'elles ne leur appartiennent, Car autrement il les en auroit in-

Matth.

23

Marc 12

Matth.

23.

iustement despouillez. Or ia n'aduienne que nous conceuons que celuy qui est la reigle de iustice, ne rende à chacun ce qui luy appartient. Et de fait, si nous lisons la Bible, les escrits de tous auteurs, nous ne trouuerons que les Magistrats ayent esté reprins d'auoir tenu le premier rang, là ou leur superiorité s'est estendue, sinon en nostre Europe, depuis l'erection de nostre Euesque vniuersel. Car si nous regardons ce qui estoit obserué il y a faize cents ans & plus, à Rome, nous trouuerons que ce grand personnage Fabius Maximus, le plus honorable de tous, voyant son fils esleu Consul, le fait marcher deuant luy, Voulant deferer tout honneur à la dignité de sa charge. Cela suffise pour le rang des Pasteurs.

Tit. Lin.
Decad. 3.
Lib. 4.

Definition des Magistrats, & quels noms honorables, & de maiesté leur sont attribuez en l'Escripture.

IL faut à present descrire la qualité des Roys & Magistrats, pour l'opposer à celle des Pasteurs. Ou pour commencer nous dirons que ce sont puissances superieures, ordonnees du Treshaut, pour faire garder sa Loy par la force, punissant les transgresseurs, & conseruant ceux qui y obtempèrent. Or ceste definition est prinse de l'Epistre saint Paul aux Romains: disant, Toute ame soit subiecte aux puissances superieures: Car il n'y a point de

Rom. 13.

de puissance sinon de Dieu, & ordonnee de luy. Et pourtant qui s'oppose à la puissance il resiste à l'ordonnance, dit Dieu : & fais tomber condamnation sur luy. Car les Magistrats ne sont point pour donner crainte à ceux qui font bonnes œuvres, mais aux mauvais: car ce n'est en vain qu'il porte le glaive, mais pour prendre vengeance de celuy qui fait mal. Suyuant cela, l'Orateur Demosthene (encores qu'il fust Payen) prononça ceste sentence, que ceux qui sont Magistrats y sont diuinement appelez. Parquoy ils doyuent estre craints & honorez, tant à cause de celuy qui nous les enuoye, que de la dignité de leur vocation. Et l'Apostre Saint Pierre, 1. Pier. 2. sous le manteau duquel on pretend l'abbaisser, exhorte tous Chrestiens d'estre subiects à tout ordre humain, pour l'amour du Seigneur, soit au Roy, comme à celuy qui est eminene par dessus tous: soit à Gouverneurs, comme enuoyez de par luy, à la vengeance des malfaiçteurs, & à la louange de ceux qui font bien. Et au mesme lieu il dit, Craignez 1. Pier. 2. Dieu, honorez le Roy. Que fil a enseigné aux fideles de son temps de porter honneur & obeissance aux Roys & Magistrats, persecuteurs de Chrestiens, combien plus le requiert-il enuers ceux qui ont soubmis leurs Sceptres sous l'obeissance de Iesus Christ? Il est certain qu'il veut qu'on leur porte double honneur & reuerence. Car fil est ainsi que le Dieu de gloire, qui habite en vne lumiere inaccessible, ait voulu de sa bouche sacree zant

Pseam. 8. les honorer, que de les appeller Dieux. Et par
Exod. 4. ses Prophetes & Apostres, leur attribuer ces
Iean 10. noms de Puissances superieures, de Roys,
 Gouverneurs, Magistrats, & Principautez.
 Quelle absurdité & audace pourroit estre
 trouuee plus grande à l'endroit de ceux qui
 ne tiennent que rang de seruiteurs en l'Eglise
 de Dieu, que de leur vouloir arracher leurs
 prerogatiues pour s'en emparer? Car quand
 il n'y auroit que les noms que le Toutpuif-
 sant leur a voulu attribuer, ce seroyent argu-
 mens assez forts pour defendre leur preemi-
 nence: Car les vns sont appelez Roys, pour-
 ce qu'il leur appartient de commander: Do-
 minateurs, pource que c'est à eux à dominer:
 Magistrats, comme appelez pour maistriser.
 Et tenir rang de Maistres Gouverneurs, pour-
 ce qu'il leur appartient de gouverner. Dieux,
 pource qu'ils representent l'image de Dieu,
 exerçans son office en terre, comme estans
 ses Lieutenans. Or voila les noms les plus ce-
 lebres & honorables qu'on puisse trouuer,
 tant aux escrits saints que prophanes, des-
 quels les Magistrats ont de tout temps esté
 honorez & respectez, pour monstrier que sur
 tous autres estats ils doyuent estre prefe-
 rez.

Que les noms que l'Ecriture attribue aux Pasteurs ne tendent qu'à les humilier, & que c'est combattre contre loix diuines & supernaturelles de les préférer aux Roys & leurs Iuges.

SI de là nous venons aux Ecclesiastiques, nous trouuerons qu'en l'Ecriture ils ont esté appelez Sacrificateurs, Leuites, Prestres, Prophetes, Scribes, & Pharisiens au vieil Testament. Et au nouueau, Apostres, Euangelistes, Pasteurs, Euesques, & Prestres. Et en general tous ceux-ci sont appelez Seruiteurs & Ministres. Cela demeurant vray, Je demande s'il y auoit quelqu'un qui vousist mettre en dispute ausquels appartient le commandement & preference des maistres ou seruiteurs, des maisons des particuliers, ou de toute vne Republique, & qu'il vousist defendre que c'est aux seruiteurs d'auoir le commandement & presceance par deuant les maistres, on le reputeroit plustost digne d'estre battu avecques des verges, que d'argumenter par raisons contre luy. Veu donc que Dieu a establi le mesme ordre entre les Magistrats & les Pasteurs, comme il a esté enseigné. Et que d'abondant saint Paul nous en instruit escriuant à Tite, ou aprez auoir dit, que les seruiteurs doyuent estre subiects à leurs maistres, & se rendre agreables en toutes choses, sans leur contredire. Il en dit par aprez autant de tous fideles, qu'ils se doyuent assubiectir aux

Tite 2.

Principautez & puissances : vsant de mesme façon de parler. Et afin de monstrier que les Pasteurs y sont compris, si nous venons à l'autorité des Peres, saint Iean Chrysostome interpretant le traizième chapitre de l'Epiistre aux Romains, dit que par ces termes, Toute ame soit subiecte, La subiection enuers le Magistrat, est commandee à tous, encores qu'on soit Apostre, Euangeliste, Prophete, Moine, ou Euesque : d'autant que cela ne renuerse la pieté. Par cela il demeure vne preuue tres-claire, que ceux qui veulent esleuer l'Ecclesiastique pour le colloquer par dessus les Principautez du monde, pour regner sur l'Eglise par loix & ordonnances, combattent directement contre l'autorité de l'Escripture sainte. L'ordre inuiolable du temps ancien. le droit des gens, & ce qui est encores à present obserué entre ceux qui sont tousiours demeurez Payens: comme en ce grand & fleurissant Royaume de Lachine, l'vn des mieux reiglez pour la pollice, qui soit au monde. Comme aussi contre le nom de Seruiteur, que les plus grands Ecclesiastiques se sont tousiours attribué, qui est le rang plus inferieur qui se trouue entre les hommes. Parquoy ne pourroit-on remarquer absurdité plus grande que de les mettre au rang que tient la Raison en l'homme, qui y doit estre dominante, pour ranger sous elle la volonté & affections, comme ses seruantes. Veu que ils se donnent le mesme nom, que font les Philosophes aux affections qui se doyuent

ranger, comme seruantes & inferieures à la raison.

*Explication du reiglement que Dieu veut estre
obserué, tant pour son regard que
des Pasteurs & Ma-
gistrats.*

ET afin d'esclaircir le poinct, il faut noter que ce grand Createur de l'vniuers, ayant vne fois disposé quel doit estre l'office & rang, à quoy chacune vocation doit s'arrester. Il veut que cela soit obserué iusques à la consommation du monde, parquoy s'estant reserué, par droit de Souueraineté, & de sa Toute-puissance, ceste prerogatiue de constituer Loix & Ordonnances sur la conscience des hommes, touchant l'adoration & seruice que il requiert d'eux : comme vn priuilege propre à sa diuinité, & reprouuant tous seruices qui ne sont diuins, spirituels, & celestes, comme non conuenans à sa qualité, ainsi qu'il a reuelé par sa Sageſſe eternelle, quand elle crioit, parlant des traditions des Pasteurs, Toute plante que mon Pere n'a point plantee, sera *Matth.* 15.
arrachee. Il a par aprez ordonné ses Magistrats, pour apprendre ses loix, les mediter & *Deut.* 17.
les faire obseruer: Et pour commander & faire loix sur la pollice & gouvernement ciuil, pour l'entretien de la société humaine, & pour reigler & reformer les abus qui se glissent sur tous estats. Et quand aux Ecclesiastiques, il les a instituez comme seruiteurs, de luy & de

Pseau. 19

Pseaum.

119.

l'Eglise son espouze, pour enseigner en icelle la sacree & seule viuifiante Parole, pour planter la Foy, & arracher l'incredulité. Ce qu'ils doyuent entreprendre, tant par la representation de la grandeur & excellence des admirables ouurages du Createur, qui paroissent aux yeux de tout le monde, que par les tesmoignages qu'il a rendus tant de luy que de sa volonté en sa sainte Parole, employans toutes leurs forces & industries à planter la vertu & extirper le vice: ainsi comme de tout temps ont pratiqué les Philosophes moraux à l'endroit de leurs disciples, sans que iamais ils se soyent pretendus esleuer par dessus les Magistrats: ains leur ont porté tout honneur & reuerence. Suyuant cela ce grand Philosophe Aristote, enseigne en ses Politiques, que en chacun art, ou estat, il y en auoit qui commandoyent, & mettoient quelque ordre: Mais que le Magistrat, par sa puissance souueraine & vniuerselle, deuoit commander sur tous autres: comme à luy assubiectis, ainsi que celuy qui pouuant commander à toutes les parties de la Republique. Comme si le medecin praticquoit d'une autre sorte que celle qui estoit approuuee: si l'Apotichaire vendoit des drogues gastees, c'estoit au Magistrat à les punir, comme n'y ayant vn seul art excepté de sa puissance. Tout de mesme si l'Ecclesiastique, de Pasteur se transforme en Loup, c'est au Magistrat à le punir, & y en mettre vn autre. Estant appelé de Dieu, aussi bien pour faire obseruer la pre-

miere Table, que la seconde, la Loy ceremoniale, que la morale, lesquelles Dieu a voulu bailler par sa main, pour faire cognoistre que cela despendoit de son office de les faire observer. Et c'est pourquoy ces grands Empeurs Chrestiens, Constantin, Theodose, & Iustinian, qui ont donné vn si grand cours à l'Euangile, y ont voulu mettre la main, recognoissans que c'estoit le principal deuoir de leurs charges. Ce qui rendoit l'Estat de l'Eglise fleurissant, avecques paix & grande felicité.

*Renuersement de l'ordre establi de Dieu par les
Pasteurs, causes des calamitez deplora-
bles dont les peuples d'Eu-
rope sont affligez.*

MAis quand au lieu de l'entretenir, les Pasteurs oublians leur condition, & de seruiteurs aspirans se faire maistres, ont voulu renuerser le bel ordre, Pour raurir l'autorité du souuerain, & se voulans esgaler à luy, pour dominer sur les consciences, leur imposer loix, & astraintre l'Eglise à les observer, & au lieu d'vn seruice spirituel & diuin, en introduire vn visible & humain, seruant de planche à l'accroissement de leur ambitieuse gloire, & reuenus. Comme aussi s'esleuer au dessus des Magistrats, & eniamber les seigneuries & iurisdicions terriennes, pour les rendre leurs inferieurs. Ce grand desordre n'a ainsi que de tout temps fait qu'enflammer l'i-

re de l'Eternel contre nous, faisant paroistre des plus grands esclats de sa vengeance, que pour autre cause qui soit suruenue. Et de fait, quand Dieu a tant de fois abandonné les Iuifs, pour les rendre esclaves des idolatres, que la Iudee a esté degastee, les femmes & filles rendues esclaves. Tels torrens de maux ont decoulé de la part des Pasteurs, ayans destourné le peuple des Loix & Ceremonies diuines, pour embrasser les humaines. Comme il est certain que toutes sectes prennent tousiours leur origine de quelque Ecclesiastique, & de leur part sont tousiours auancez, avecques leur impudence trop coustumiere: Comme cela se voit aux Prestres qui se van-

E. Chron.
7. roient à l'encontre du Prophete Helye, de faire tomber le feu du ciel pour brusler leurs sacrifices, & aux prestres du dieu Belus, qui faisoient croire que leur dieu d'airain mangeoit tout ce qui luy estoit offert, obeissans ou cela n'estoit veritable d'estre mis sur le champ à mort. La menterie desquels estant descouuerte par Daniel & Helye, vrais Prophetes, furent cause qu'ils furent tous destruits. Quand les Iuifs furent presque tous deffaicts, & le reste mené captif en Babylonie, ce fut pour le mesme suiet. Quand Antiochus pillà le Temple de Ierusalem, exerçant toutes cruantez sur ceste nation, cela aduint pour la mesme cause. Qui ayant continué ses effects, quand saint Iean, & nostre Seigneur Iesus Christ apparurent au monde, ils trouuerent diuerses sectes, les vns estoient

2. Mach.
2.

Pharisiens, les autres Saduceens, & les autres
 Esseens, qui introduisans nouuelles tradi-
 tions, troubloyent l'vnité de l'Eglise: lesquels
 combien qu'ils ne manquaissent d'une belle
 apparence de sagesse & saincteté, toutesfois
 le Fils de Dieu plein de la plus grande beni-
 gnité & douceur du monde, les tenant pour
 les plus detestables de l'univers, leur impro-
 pere toutes sortes de contumelies, les appel-
 lant hypocrites, sepulchres blanchis, meur-
 triers des Prophetes: imitant son Precurseur
 saint Iean, qui les voyant venir à luy, les ap-
 pelloit Engeance de viperes. Et pourquoy le
 courroux diuin festoit-il tant embrasé con-
 tre-eux? sinon de ce que au lieu de se contenir
 en leur rang & simple ministere, qui consiste
 à enseigner la Loy diuine, qui seule transfere
 nos ames de mort à vie. Sa lumiere estoit par
 eux offusquee, par vn ramas de ceremonies
 & doctrines humaines, vsurpans sur l'office
 des Magistrats, auxquels seuls appartient de
 faire loix. Car comme Dieu chastia Osias,
 Roy, quand il voulut entreprendre d'exercer
 l'office de Sacrificateur, de maladie de lepre.
 Et Saul, autre Roy, quand il voulut s'y ad-
 uancer: encores que cela ne leur aduienne
 qu'une fois, combien plus griefuement puni-
 ra-il le desbordement de tous Pasteurs, qui
 n'estant appelez que pour seruir à l'Eglise,
 monstrent exemple du mespris des richesses &
 honneurs mondains, pour attirer les hommes
 au ciel, à une gloire & felicité perdurable, n'a-
 spirant à present qu'à s'emparer d'une pree-

Matth.

23.

Galat. 5. minence humaine , à despouiller les Magistrats de la leur, pour regner sur l'espouze du Fils de Dieu par loix & constitutions , pour luy raurir la liberté , que par sa mort & effusion de son sang il luy a acquise.

Preuve comme pour auoir souffert à l'Ecclesiastique d'introduire telles traditions il s'auance iusquos à vn extreme desbordement.

ET partant n'est plus requis combatre de la qualité d'icelles, ne rechercher de friuoles distinctions , pour en approuuer quelque partie, veu que le Souuerain Legislatteur les reprouue toutes: comme il apparroist en l'ordonnance faite par les Sacrificateurs, & Prestres des Iuifs , de ne manger sans lauer ses mains, pretendans à induire les hommes à estre nets exterieurement , pour les amener à vne pureté interieure, & fuir toute souilleure: laquelle estant transgressée par les Apostres, les Scribes les accusent à Iesus Christ comme coupables d'un bien grand crime, d'auoir violé vne Loy fort ancienne. Mais que leur respond la Sageffe eternellement residente en Dieu , Allez Hipocrites, qui auez par vos ordonnances aneanti les Commandemens de Dieu , Tout ce qui entre en la bouche de l'homme ne le souille point. Que si il les condamnez pour vne chose de si belle apparence & de legere importance, Quels espou-

Marc 7.

uantables iugemens prononcera-il contre ce-
 ste effreneë multitude de Canons, & Decrets
 des Ecclesiastiques, reduits en aussi grands
 volumes que les loix Imperiales? ou ils s'es-
 leuent comme Roys des Roys, & Domina- *Esaye 29*
 teurs des Dominateurs, à establir vne Hie-
 rarchie terrienne, au lieu de la condition de
 seruiteurs, ou le Fils de Dieu les à rengez:
 contreuenans à laquelle, ils se sont desfreiglez
 iusques là, que d'establir diuers degrez de
 iurisdiction, & constituer iuges pour y presi-
 der: constituant la forme des iugemens, tant
 ciuils que criminels, estant venu le siege de
 Rome, iusques à vn tel desbordement de di-
 re qu'à luy appartenoit de iuger de toutes
 choses, sur la rotondité du monde: Que nul *Gelasius*
 autre siege ne pouuoit iuger de luy, qu'il pou- *in Decret.*
 uoit condamner ceux qu'on auoit absouls *9. quest. 3*
 aux Conciles, & absouldre ceux qu'on y a- *cap. Cuni-*
 uoit condamnez. S'attribuant en ce la puis- *sta.*
 sance absoluë de iuger de tout le monde à son
 plaisir, au lieu que le Fils de Dieu a refusé de
 iuger entre deux freres, comme n'estant ap- *Luc 12.*
 pellé à cela. Or ceci n'est dit pour donner
 blasme particulier à ceux de Rome, pour ce
 que les autres Patriarches d'Antioche, Con-
 stantinople, Alexandrie, & Ierusalem n'aspi-
 roient à moindres prerogatiues que luy. S'e-
 stans tous rendus semblables aux seruiteurs
 de quelque grand seigneur, qui voyant qu'il
 doit estre long temps absent de sa maison, les
 auroit laissez pour seruir à son espouze: qui
 incontinent entreroient en débats à qui se-

roit le plus grand d'entre-eux, pour dominer sur elle, luy prescrire loix, & la contraindre par tourmens & prisons à les obseruer. Ce qui a non seulement rempli l'Eglise de Iesus Christ de troubles & diuisions: mais, qui plus est, a esmeu le courroux de Dieu sur son peuple. De telle sorte que nous voyons desia trois de ces Sieges auoir esté abandonnez de luy, en la puissance des Turcs: qui ont desia enuahy plusieurs pays de celuy de Rome, pour auoir diuisé les Chrestiens, sur la dispute de leurs preferences & constitutions, qui n'ont serui en ce temps que de torches flamboyantes pour allumer ce feu de discorde qui destruit & ruine les Gaules, par si longues guerres ciuiles, pour auoir pretendu forcer par prisons, feuz, bannissemens, & autres cruels supplices, vne partie de ce peuple qui ne vouloit recognoistre ceste immense domination du siege Romain, ne se renger indifferemment à toutes loix qui en procedoyent, qui fait preuue qu'elles attirent tousiours vne certaine malediction de Dieu, qui les poursuit: comme ne pouuant estre introduites, sinon en rauissant la superiorité de Dieu, & de ses Magistrats: ausquels par vn singulier priuilege cela appartient.

*Acceleration des Ministres à forger nouvelles
loix, moins supportables qu'aux
autres.*

ET pour faire cognoistre que ie ne suis transporté d'aucune passion particuliere, contre l'Ecclesiastique Romain, & que ie parle generalement contre ceux qui pretendent tenir rang de Pasteurs en l'Eglise. Je diray contre les Ministres, qu'ils sont en ceci beaucoup moins supportables que les autres, pource que venans encores de naistre, & faignans ne se resouvenir de l'article cinquième de leur Confession de Foy, où ils ont employé que la Parole de Dieu, comprise aux liures du vieil & nouveau Testament, contient tout ce qui est nécessaire pour le seruice de Dieu, & nostre salut: n'estant loisible aux hommes, ne mesmes aux Anges d'y adiouster, diminuer, ou changer, n'ont laissé pour cela tout aussi tost à y contreuenir: encores qu'ils eussent leurs ennemys sur les bras, & qu'ils ne fussent pleinement establis par la France, festans monstrez si alterez à introduire nouvelles loix, qu'en moins de dix ou douze ans il y auoit autant de disciplines particulieres qu'il y auoit de prouinces en ce Royaume, sans parler de la generale. De maniere que s'ils auoyent continué l'espace de cent ans à en introduire autant, ils auroient surpassé la grandeur du Nouveau Testament. Entre lesquelles il s'en trouue dont n'auoit esté aucune mention sous la rotondité des cieux, de-

puis la formation du monde, Où ie mettray à la pointe leur ordonnance d'imposer aux enfans les noms de la Bible, pour priuer les peres de la liberté qu'ils ont tousiours eüe, de donner noms conuenables à leurs enfans. Or qu'à produit ceste belle Loy? Sinon vne diuision entre ceux mesmes qui tiennent leur parti, dont aucuns maintiennent qu'ainfi que les Iuifs donnoient noms de leur langue, & souvent propres pour vn memorial de quelque euenement, ou les prenoient de quelque homme vertueux. Aussi les Chrestiens peuvent faire le semblable, & qu'en cela ils voudroyent faire les noms cooperateurs auecques Dieu, pour le salut des hommes. Et que il n'y a raison d'oster de l'Eglise tels noms, comme de Charles, Constantin, Theodose, Loys, Henry, & de grand nombre de martyrs & d'autres bons Chrestiens, qui viuent au iourd'huy. Pour ce que ceux qui ont porté les noms ci dessus recitez, ont plus fait pour l'aduancement de l'Euangile, que Iuifs Hebreux qui ayent esté au monde. Autant en peut-on dire pour la signature de leur discipline, qui a monstre exemple aux Catholiques de faire signer choses contraires, en condamnant ce qu'ils en auoyent signé. Au moyen de quoy telle tradition n'a fait que naurer les consciences de ceux qui l'auoyent signee. Ils ont aussi escrit articles contre la danse, contre les ieux de Comedies, & de Farfes: lesquelles ils se sont plus esuertuez de faire plus estroitement obseruer que nulle ordonnance

diuine, s'eschauffans, & escumans de plus
 grande cholere contre ceux qui y auoyent
 beaucoup trauaillé, que s'ils auoyent mespri-
 sé quelque ordonnance diuine. Or en cela les
 Pasteurs Catholiques ont monsté vne mo-
 deration plus louable, qui se contentans de la
 reprouuer en s'en abstenant: & de la reietter
 en leurs sermons comme chose dissoluë, sans
 s'en tourmenter dauantage. Au lieu que ceux-
 ci foudroyoyent contre ceux qui s'estoyent
 trouuez à quelques miracles, vsans de priua-
 tion de Cene, & de repatations honorables
 pour ce suiet: ainsi que contre quelques cri-
 mes énormes, se persuadans en cela estre plus
 sages & aduisez, qu'aucuns Prophetes, Apo-
 stres, ni Docteurs de l'Eglise ancienne qui ne
 se sont beaucoup tourmentez apres choses si
 legeres. Or quel aduantage leur a apporté ce-
 la, pour l'accroissement de leurs Eglises? si-
 non d'en faire retiter la ieunesse, qui facile-
 ment ne se priue de tels plaisirs. De maniere,
 que au lieu qu'un Prescheur bien aduisé se
 doit efforcer de leuer tous empeschemens qui
 retardent qu'on n'embrasse sa doctrine, ceux-
 ci recherchoyent des obstacles pour en rete-
 nir beaucoup de s'y adioindre. Qui est pour
 monstrier que quelque grand sçauoir ou sa-
 gesse humaine, qui esleue aucuns Pasteurs,
 pour acquerir reputation d'estre comme de
 grands luminaires, ou Anges celestes. Si est-
 ce que depuis que oublians leur condition,
 qui est de seruir à l'Eglise, ils veulent entre-
 prendre sur l'autorité de Dieu & des Magi-

strats, ses Lieutenans, telles loix n'apporteront que disputes & partialitez, & toutes diuisions au monde: comme y ayant tousiours vne malediction diuine, coniointe à icelles, quelque beau lustre qu'elles ayent en apparence.

Des loix des Magistrats, de leur excellence, & de la benediction diuine qui les accompagne.

MAis si de là nous contemplons les constitutions procedées des Magistrats, nous n'y trouuerons rien de semblable: car au contraire nous y voyons reluire vne benediction diuine qui tousiours les accompagne. C'est par elles que les hommes agrestes & barbares, ont esté ciuilizez, & rendus sociables, comme reuestues d'une Maiesté pleine de si grande efficace, que tous les hommes sont contraints les approuuer. Entre lesquelles sont les premieres, celles de Moysé qui furent receuës d'un commun consentement, tant des Iuifs, Turcs, Perses, que Chrestiens, comme loix de Nature. Celles des douze Tables, ordonnees par les Grecs, ont eu approbation de tous peuples. Le Droit Ciuil composé par les Empereurs & Magistrats, est aduoué & receu de tous humains, seruant comme de grands luminaires pour esclairer les humains parmi la confusion des affaires du monde, & pour pollir & accroistre le iugement de ceux qui les apprennent. Voila pour-

pourquoy il n'est requis de gibbets, de tortures, de feuz, ne inuenter des cruantez inhumaines pour les faire aduouer, veu que tous franchement les louent avecques admiration d'icelles. Et tant s'en faut qu'elles ayent produit meurtres, guerres ciuiles, ne diuisions, que plustost elles en retranchent le cours. Et d'ou procede vne si grande benediction? Sinon que ceux qui les ont establis n'ont rien entrepris qui n'appartienne à leur vocation, estans reuestus d'une si grande force, que ceux qui sont condamnez à la mort pour la transgression d'icelles, sont contraints d'approuuer leur condamnation. Que s'il aduient autrement, cest seulement lors que les Ecclesiastiques empruntent leur puissance à maintenir leurs traditions, & se venger de ceux qui les ont transgressées. Contre lesquelles ceux qu'ils font punir crient au milieu des feux, & sur les eschaffaux, implorans la iustice diuine pour vengeresse de leur iniuste condamnation. Ce que voulans confermer par argumens, ils reduisent l'Ecclesiastique à ceste extremite, d'implorer du Magistrat de leur faire couper les langues, ou les embailonner. Contreuenans du tout à leur qualite, qui les deuroit rendre benins & misericordieux: qui est bien pour demonstrier, tant par l'issue que euenemens de leurs constitutions, que ils ont Dieu, & la nature mesme qui les combat.

*Que c'est chose repugnante à la vocation des
 Pasteurs, veu que l'infirmité humaine est
 si foible, qu'elle ne scauroit accom-
 plir les dix Comman-
 demens.*

Jean 12.

ET de fait, que peut-on trouuer plus repu-
 gnant au deuoir du rang qu'ils doyuent
 tenir, que d'imposer nouuelles loix sur la
 conscience des fideles, qui ne peuuent operer
 sinon de les amener à vn desespoir. Veü que
 Dieu n'ayant ordonné que dix Commande-
 mens, la corruption & impuissance humaine
 est telle, que iamais homme ne les a peu ob-
 seruer. Parquoy veü que Dieu maudit tous
 ceux qui les transgresseront, voila toute la
 race d'Adam enclose sous ceste malediction:
 de laquelle ne se pouuant deliurer, le Pere
 celeste a enuoyé son Fils, pour du tout l'ac-
 complir, & descharger son Eglise de tant de
 loix ceremoniales: lesquelles auant sa mort
 elle estoit tenue obseruer aux mesmes peines.
 Et voila pourquoy il preschoit de luy mesme,
 Je ne suis point venu pour condamner le
 monde, mais pour le sauuer: d'autant qu'en
 outre l'effusion de son sang, espendu pour la
 remission des pechez, il auoit deliuré les siens
 d'une infinité d'ordonnances, où les peres e-
 stoyent asserruis. Et au lieu de la Circoncision,
 grieve à endurer en la chair, il auoit institué
 le Baptisme, exempt de douleur: Et pour
 l'Aigneau Paschal, figurant son sacrifice fu-
 tur, establit la sainte Cene, pour tesmoigna-

ge qu'il auoit souffert mort. Sans s'estre onc-
 ques immiscué de faire aucune Loy à son E-
 glise. Mais renuoyant ceux qui l'en interro-
 guoyent à celles de Moÿse, & de Cesar, Ma-
 gistrats, voulant faire cognoistre que luy, ses
 Apostres, ne autres Pasteurs, ne sont appelez
 pour charger les consciences, d'ordonnances
 ni de traditions: ains plustost pour les en af-
 franchir, dont nous faut inferer ceste conclu-
 sion, que si le Redempteur prononce qu'il
 est venu pour sauuer les hommes, pource que
 il les a deliurez de grand nombre de tradi-
 tions: encores qu'elles fussent ordonnees de
 Dieu, Que ceux-là qui se sont employez
 pour les enlasser en celles des hommes, ne s'a-
 uacent que pour les damner. Et la raison y
 est tres-apparente, pource que selon saint
 Paul, là où il n'y a point de Loy, il n'y a point
 de transgression: où il n'y a point de Trans-
 gression, il n'y a point de peché: & où il n'y a
 point de peché, il n'y a point de condamna-
 tion. Dont s'ensuit que tous fabricateurs de
 loix, soyent Morales ou Ceremoniales, en
 l'Eglise de Dieu, apportent autant de nouuel-
 les causes de condamnation, pource que ne
 pouuans estre accomplies, non plus que cel-
 les de Dieu, pour la fragilité de l'homme,
 pensant y estre autant obligé que aux diui-
 nes, il se rend coupable de mort par la trans-
 gression d'icelles. Ce que Mahomet imitant
 (comme singe) le Fils de Dieu, semble auoir
 considéré; Quand en son Alchoran il veut
 persuader aux hommes, qu'ayant esté trans-

*Thence
 en sa Cos-
 mogra-
 phie.*

porté au ciel deuant Dieu: qui luy ayant baillé grand nombre de loix, difficiles à accomplir aux hommes. Auant que d'en descendre il va trouuer Moyse, par l'intercession duquel & de luy, il en retrancha vne moitié. Ayant par là donné à entendre qu'il auoit beaucoup fait pour les siens. Au lieu que nos Pasteurs, tant s'en faut qu'ils aspirent là, qu'il n'y a bord ni fonds à la multitude de leurs Constitutions: desquelles, non seulement le peuple est affligé, mais aussi les Prestres extrêmement surchargez.

Comme par l'autorité de Sainct Pierre les Ecclesiastiques n'ont seigneurie, ne pouuoir de faire loix.

1. Pier. 5.

MAis d'autant que ceux qui sont les auteurs prennent leur fondement sur la succession de sainct Pierre, examinons quelle en a esté sa doctrine, quand il dit, Je prie les Prestres, moy qui suis Prestre avecques eux: tesmoin des afflictions de Christ, & participant à la gloire qui sera reuelee, Païssez le troupeau qui est entre vous, avecques sollicitude, & sans affection de gaing deshoneste. Et non point comme ayant seigneurie sur les heritages du Seigneur: mais tellement que soyez exemples du troupeau. Et quand le principal Pasteur apparoitra vous receurez la couronne incorruptible de gloire Or de ce passage nous en faut tirer trois conclusions

sur l'office des Pasteurs, La premiere, qu'ils doyuent seruir à Dieu & à son Eglise d'une franche volonté, & non point aspirer aux profits & richesses. L'autre, qu'ils n'ont point de seigneurie sur les Eglises ou ils seruent: Et pour la derniere, qu'ils ne doyuent chercher en terre la remuneration de leurs labeurs: mais en la gloire celeste, ou ceux qui feront leur deuoir feront reuestus d'une couronne speciale de gloire. Or d'autant que mon but n'est de traiter de la premiere, ie m'arrestera à la seconde, & en infereray que si saint Pierre se despouille, luy & ses compagnons, de toute seigneurie sur les heritages du Seigneur, qui sont ses Eglises, que par mesme moyen il les despouille de toute dignité & puissance à y establir loix, non seulement pource que ce sont choses qui doyuent estre coniointes: mais aussi comme estant la puissance de faire loix, une prerogative trop plus grande que d'auoir seigneurie. Car il s'en trouuera quelquefois en vn Royaume plus de trois mil ayans seigneurie, qui pourtant ne s'attribueront ce pouuoir, & n'y aura qu'un seul Roy qui en puisse establir. Parquoy se trouuans les Pasteurs priuez par celui dont ils se tiennent le plus honorez, d'estre successeurs de toute seigneurie sur les Eglises. De là s'ensuit que le pouuoir de constituer Ordonnances, leur est aussi osté, selon que Saint Iacques dit qu'il y a vn Législateur & Iuge, qui peut sauuer & perdre. Au moyen dequoy quand nous recognoissons tous Pasteurs pour suc-

Esaye 33

Luc 4.

cesseurs de saint Pierre, & que pour leur deferrer beaucoup d'honneur, nous leur attribuerons esgale puissance à la sienne. Si est-ce que par son autorité ils sont degradez de seigneurie, & du rang de Legislateurs, parquoy quand foulans au pied la doctrine de ce saint Apostre, ils entreprennent de faire ordonnances sur l'Eglise espouze de Dieu, ils se rendent coupables, non seulement de leze Maïesté diuine à l'encontre de ce grand Dieu des armées: mais aussi contre les Roys & Potentats de la terre qu'il y a establis pour ses Lieutenans, les ayant voulu honorer d'une dignité si haute, comme propre à la grandeur de leurs charges.

*Le chemin par lequel Dieu veut donner gloire
à l'Ecclesiastique, c'est en s'ab-
baissant premiere-
ment.*

MAis quelqu'un pourra obiecter que ie me monstre plus que nul autre affectionné à r'aualler la hauteſſe Ecclesiastique, les voulant ſouſmettre aux Magiſtrats, & leur retrancher tout eſtabliſſement de loix, comme ſi i'auois entrepris les faire decheoir du plus haut rang qu'ils occupent, pour les colloquer aux plus bas lieux: mais tant ſ'en faut que ce ſoit mon blanc, que ie pretends les retirer dū centre de la terre, ou ils ſemblent auoir fiché l'anchre de leur ſouuerain bien, pour les eſleuer aux throſnes celeſtes par deſ-

sus le ciel doré, pour receuoir vne couronne
 de gloire incorruptible, dont il semble qu'ils
 se veulent priuer, pour la vanité de ce mon-
 de, de laquelle infailliblement (s'ils me veu-
 lent croire) ils seront resplendissans par dessus
 tous humains, pourueu qu'ils entrent & con-
 tinuent le chemin ou ie les veux mettre: dont
 ie ne seray l'inuenteur, mais celuy qui a dit,
 qu'il estoit le chemin, la verité, & la vie, l'a
 tracé spécialement aux Apostres, & à leurs
 successeurs. C'est assauoir que celuy d'entre-
 eux qui s'abbaissera sera esleué, & cil qui s'es-
 leuera sera abbaissé. Veut donc, quelqu'un ap-
 pellé en ceste charge, receuoir ceste couron-
 ne? qu'il commence par là, considerant que
 c'est la voye ordonnée de Dieu à tous Eccle-
 siastiques. Et le chemin que ce bon & grand
 Pasteur de nos ames a exactement obserué,
 s'estant abbaissé iufques là, (neantmoins que
 tout genouil doyue ployer deuant luy, soyent
 celestes ou terrestres) que de se ranger iuf-
 ques là, que de faire vn vil seruice à ses disci-
 ples, endurer vne mort ignominieuse pour les
 siens. Au lieu que ceux qui se disent ses suc-
 cesseurs se font baiser la pantoufle aux plus
 anciens Empereurs du monde. Mais si nous
 regardons, ou poursuyuant ce chemin il est
 entré, nous trouuerons qu'il a esté colloqué
 à la dextre de Dieu, pour obtenir Empire,
 non seulement dessus toutes les principautez
 du monde, mais que par tel chemin il a esté
 fait Chef des Anges, pour commander à tou-
 tes les puissances celestes & terrestres. Ce que

estant cogneu par ses Apostres, & entre-autes par saint Iean & saint Paul, qui par vne faueur speciale l'ont veu en ceste sienne grande gloire, Comme aussi les autres, ils ont tous esté ses imitateurs, en poursuivant le mesme chemin. Comme par semblable les premiers Euesques, iusques au temps de Theodose, & de Iustinian, ou l'Eglise Chrestienne a esté la plus grande & fleurissante qu'elle ait esté. C'est pourquoy ils ont receu vne grande ioye, en s'appellant seruiteurs de Iesus Christ, & de son Eglise, non point par feintise ou hypocrisie. Comme font ceux qui à present se disent tels de parole, & en leurs œuures font actes de Roys & Empereurs. Car ce qu'ils en ont fait ç'a esté en verité, croyans que c'estoit le seul sentier par lequel ils seroyent couronnez de gloire, en la beatitude celeste & eternelle, ainsi que les vrais Prophetes qui ne s'en estoient aucunement destournez. Desquels la memoire estant demeuree en ce monde, honorable, est pour tesmoignage de leur felicité perdurable. Car deuant Dieu celuy qui s'humilie sera exalté, & celuy qui s'eleue sera abbaissé. Et dauantage, Dieu resiste aux orgueilleux, & donne grace aux humbles, comme l'Ecriture sainte nous tesmoigne.

*Exemples de la vierge Marie & de saint
Iean, ayans passé par le che-
min d'humilité.*

ET pour confirmation de ce que dessus, si nous iettons nostre veuë sur le chemin par lequel a marché la treshonoree Vierge Marie, tant s'en faut qu'elle fust enflée d'une gloire mondaine, pour l'abondance des graces dont le ciel l'auoit enrichie, que plustost, selon que tesmoigne saint Luc, elle s'appelle Luc I. la seruante du Seigneur: disant par aprez que il a regardé la petiteesse de sa seruante. S'abbaissant par sa grande humilité, lors qu'elle deuoit produire le Sauueur du monde, que de ne prendre qu'une estable, pour la nuit en son hostellerie. Mais aussi aprez elle tesmoigne que pour cela tous aages la diront bienheureuse. Comme donc ç'a esté la plus humble des femmes, enclose sous la voute celeste: aussi a-elle esté esleuee par dessus la hauteesse des cieux, en la gloire eternelle. Non seulement par dessus celles de son sexe: mais aussi de tous les hommes, comme ayant esté mere du Seigneur. Et de là nous considererons l'accoustrement de saint Iean Baptiste, lequel estoit de poil de chameau, sa ceinture de cuir, sa demeure, son viure, & le tesmoignage que il s'est rendu, de n'estre pas digne de deslier la courroye du soulier de l'Aigneau de Dieu, nous verrons qu'il est entré par le chemin que ie monstre: par lequel sa louange est demeurée ici bas immortelle, sans parler de la Cou-

ronne de gloire, dont Dieu l'a glorifié, tant deuant ses saincts Anges, que tous les habitans des cieux. Et autant de temps que les Pasteurs ne se paroyent que d'humilité, on voyoit le regne du Fils de Dieu s'accroistre & fleurir par le monde. Mais depuis que les grandes richesses decoulerent en l'Eglise, & que à ceste cause les Pasteurs quittans leur humilité, pour estre superbes & presumptueux, voulans entrer en dispute avecques les Roys, pour s'esgaller à eux, & les imiter à faire Ordonnances & Loix, on n'a veu que tout affoiblissement & diminution de la Chrestienté. D'autant que faignans d'ignorer ce que le Seigneur a dit, que son Esprit habitera sur l'humble de cœur : & qui est tremblant à ses paroles. Et ce qu'enseigne saint Augustin, que la premiere, seconde, & troisieme vertu Chrestienne, estoit Humilité. Ils n'ont aspiré que à s'esleuer par dessus les plus grands Throsnes & Dominations, pour s'emparer des honneurs du monde. Et toutesfois on peut veoir que ce saint personnage, & autres de son temps, qui s'estoyent parez de ceste belle vertu, ont esté plus venerables que tous ceux qui n'ont tendu qu'à vne gloire mondaine, qui s'est aussi tost escoulee qu'eux en ont esté ostez.

Que la simplicité est la robe de laquelle les Pasteurs doyent estre reuestus pour se rendre honorables.

ET suyuant cela, l'expérience a tousiours monstré que la simplicité qui reluira en vn Ecclesiastique, a quelque vertu & operation occulte, procedante du Treshaut. Au moyen de laquelle quand il fuit les honneurs & gloires du monde, c'est lors qu'elles le poursuyuent, ainsi que l'ombre fuit le corps: Et quand il les poursuit, c'est lors qu'elles s'absentent. C'est pourquoy il est aduenu que les premiers Euesques de Rome, foullans aux pieds toutes grandeurs & opulences terriennes, estoient reputez dignes de double honneur par l'vniuers: Mais quand leurs successeurs ont voulu abbaissier tous Empires & Principautez au deffous d'eux: prendre le pas deuant les Roys de la terre, affectans les surpasser en pompes & delices, & assubiectionner tout le monde à leurs Canons & Decrets. De là est aduenu que toutes ses louanges qui resonnoient d'eux en la bouche d'un chacun, a esté conuertie en toutes contumelies & opprobres: Comme estant vne execution de l'arrest du Fils de Dieu. Car pour le regard de ceux qui sont demeurez Catholiques Romains, iugeans des choses sans passion, ni consideration d'interest particulier, ils condamnent ceste immense grandeur, maiesté & opulence, ou le Pape & les Prestres de Rome se sont ainsi haut esleuez. Et quand à ceux

qui s'en sont departis, cela leur a fait conce-
 uoir opinion que c'estoit vn siege d'Ante-
 christ. Or quand aux Eglises Orientales qui
 festoyent rangees sous le Patriarche de Con-
 stantinople, ils n'ont peu porter vne hauteſſe
 ſi grande, ne la multitude de ſes Ordonnan-
 ces. Et outre ceux-ci, voici les pires ennemis
 que luy a enfantez vne ſi eſtrange opulence
 & grandeur: C'eſt aſſauoir des enuieux, en la
 ſucceſſion de ſa charge, qui (deſirans accroi-
 ſtre leurs maiſons) eſpient de les empoison-
 ner, pour en ſubſtituer de leurs familles en
 leurs places, qui ſouuent accelerent le perio-
 de de leur vie. Voila pourquoy ſi cela deſ-
 pendoit de mon election, i'eſſirois pluſtoſt la
 ſimplicité des premiers Eueſques de Rome,
 & viure ſans reproche, qu'en m'eſleuant ſi
 haut receuoir blaſme d'eſtre cauſe de tant de
 guerres & diſputes dont la Chreſtienté eſt
 remplie. Pour fermer la bouche à ceux qui les
 accusent d'auoir mis la Chreſtienté en telle
 combuſtion, pour leur ſeruir de planche pour
 monter ſi haut: & pour crainte qu'ils ont que
 ſa concorde ne les r'abbaiſſe d'un ſi haut
 rang.

*Comme les Eccleſiaſtiques doyent paître leurs
 troupeaux, & quelle paſture ils leur
 doyent donner.*

OR en ce lieu conuient traiter briefue-
 ment en quoy conſiſte l'office des Pa-
 ſteurs, ou premierement ie diray qu'ils doy-

uent estre remplis d'une vehemente dilection
 enuers leurs troupeaux, pour seruir d'exem-
 ple à le conioindre par Charité & dilection
 mutuelle, sans laquelle toutes les plus belles
 vertus dont ils puissent estre ornez, sont en
 mespris deuant Dieu. Car encores qu'ils
 foyent sçauans, & parlent comme le langage
 des Anges: & que miracles se fassent par eux,
 si est-ce que deuant Dieu qui n'a Charité ne
 luy est agreable. En second lieu, ils doyuent
 estre contens des gages qui leur doyuent e-
 stre suffisamment donnez, sans excogiter par
 subtils artifices attirer la laine, & succer le
 sang de leurs ouailles, que saint Pierre appel-
 le gaing deshoneste. Par aprez se proposer
 que l'Eglise où ils doyuent seruir, encores
 qu'elle soit rampante sur terre, est neant-
 moins appelée le Royaume des cieux. Par-
 quoy la pasture qu'ils doyuent luy presenter
 doit estre du tout celeste: ayant l'œil fiché
 pour empescher par tous moyens que leurs
 ouailles ne soyent repeuës de ce qui n'est que
 humain ou terrestre, veu que le diable est ap-
 pellé le prince du monde. Que Iesus Christ
 disoit à ses Apostres, qu'il les auroit en haine
 pource qu'ils n'estoyent du monde. Parquoy
 pour bien conduire leurs troupeaux faut que
 ils les en retirent, autant qu'ils peuuent, pour
 les mener aux pasturages viuifiants, estans au-
 prez de ce grand fleuve à quatre chefs, dont
 l'un s'appelle Tigris, & l'autre Ganges, qui se
 ressentent encores de la fertilité delectable de
 ce tant precieux Iardin, que Dieu auoit assis

1. Corin. 13

1. Pier. 5

Iean 12.

Iean 17.

aux enuiron, dont la rebellion de nos premiers parens nous a exclus: pour là comprendre l'excellence de l'homme, lors qu'il fut produit par ce grand Createur, & la misere ou il est decheu par sa transgression, pour chercher son reſtabliſſement enuers son formateur. Et à ceſte fin leur faire prendre & digerer tout le comprins du Geneſe. Par aprez les conduira ſur le mont de Sinay, eſleu de Dieu pour publier la Loy Morale, par ſon Magiſtrat Moyſe, pour vn rafraichiffement de celle de Nature, obſcurcie par le peché de l'homme. Et d'autant qu'elle fut baillee auecques frayeur, & qu'elle vſe de menaces. Ils conduiront leurs troupeaux au mont de Sion d'où ſont ſortis ces Cantiques diuins, remplis de conſolation du grand Berger, & Roy Dauid, pour ſ'eſgayer en la contemplation des œuures tant admirables du Tout-puiſſant, pour admirer en icelles la parfaite Sageſſe, la Toute-puiſſance & bonté infinie du Createur, qui en a rempli le monde, comme vne boutique tres grande de grande diuerſité d'eſtophes. Comme auſſi en la recognoiſſance de ſes vertus: comme ſa Bonté, Juſtice, Clemence, Miſericorde, Liberalité, Patience, & Benignité, pour imprimer vne dilection enuers luy, qui retire tels troupeaux de l'offenſer. Et de là leur faire gouſter le Pain de la Manne celeſte, & amenement de ce grand Berger, qui deuoit expoſer ſa vie pour le ſalut de ſes oüailles, leur faiſant gouſter les Propheties diuines d'Eſaye, & Daniel, pour puis

aprez les amener en ce terroir fertile de Sichar, ou estoit la fontaine de Iacob, dont puissoit ceste pource Samaritaine, qui y trouuera l'origine & source d'eau viuifiante, faisant tressaillir les mortels à la vie-ernelle. De laquelle les vrais Pasteurs doyuent repaistre leurs troupeaux, par ces excellentes & belles plaines de l'Euangile. Tant pour y trouuer le lauement des pechez, que la vraye viande qui nourrit en vie-ernelle, nous ayant rendu sa chair viuifiante, afin que croyans en luy, selon sa Parole, & le receuant par ses Sacramens qu'il a instituez, & commis à ses Pasteurs, & nous retirans de peché, nous ayons iouissance de la beatitude celeste. Or est-il que les Pasteurs qui retiendront leurs brebis en telle pasture, ne receuront point de blasme d'auoir infecté leurs troupeaux d'aucune contagion d'heresie, pource que telles pastures sont repargees des herbes dangereuses, ou veneneuses. Mais si faisans peu d'estat d'icelles, ils arrestent leurs oïailles aux inuentions humaines, au lieu d'y trouuer nourriture, ils leur feront prendre des Douues, de l'Aconith, & de la Ciguë, qui sont herbes veneneuses, qui par leur poison, & à leur dam les feront perir.

*Que les Pasteurs sont medecins spirituels, qui
doient cognoistre les maladies de
l'ame, & remedes pour
en guarir.*

Iean 12.

Galat. 5.

OR combien que par ce que dessus soyent
exprimez les plusgrans trauaux des Pa-
steurs, si est-ce qu'il leur faut passer plus ou-
tre en vne autre partie de leur charge, qui est
bien honorable, c'est de medeciner leurs ou-
aillcs si elles sont malades de quelque conta-
gion, vniuerselle ou particuliere. Pour raison
dequoy ils sont medecins spirituels, dont l'of-
fice excelle la medecine du corps, autant que
il est inferieur à l'ame. C'est poutquoy le Sou-
uerain Pasteur disoit, voyaut mespriser les re-
medes, ceux qui sont sains n'ont que faire de
medecin : Et qu'il disoit que les yeux des
Iuifs auoyent esté auégles, & leur cœur en-
durci, afin qu'ils ne se conuertissent à luy, &
qu'il ne les guarist. Suyuant cela c'est excel-
lent medecin Gallien, a fait vn Traitté pour
cognoistre les maladies de l'esprit, & la cure
d'icelles, mettant l'auarice & ambition pour
pestes tres-contagieuses de l'ame, & par aprez
nos furieuses & desreiglees affections: ayant
baillé receptes conuenables pour les purger.
Aussi faut-il que les Pasteurs cognoissent par
la doctrine de Sainct Paul, que l'Auarice est
la racine de tous maux. Et que rien ne doit e-
stre fait entre-eux par vaine-gloire, que tou-
tes passions turbulentes de haine, ire, cholere,
& vengeance, qui sont fructs de la chair, qu'il
faut

faut retrancher, & que le Souuerain médicament qu'ils ayent eut de purger l'incrédulité, source des vices, pour engrauer la Foy ouurante par Charité. Et pource que quelque deuoir qu'ils facent ils ne peuuent empescher que plusieurs ne tombent en de grandes fautes, & maladies, leur office est ou les medecines generales n'apportent guarison, de visiter les malades; pour leur faire entendre la grandeur & qualité de leur mal, & le peril eminent ou ils sont, s'ils n'vsent des remedes qui leur doyuent enseigner. Ainsi que pratiqua Nathan le Prophete à l'endroit de Dauid, pour le meurtre & adultere par luy commis. Et saint Ambroise à l'Empereur Theodose qui auoit fait mourir en sa cholere grand nombre de Chrestiens, lesquels obtemperans au conseil de si excellents medecins, par vne penitence publique & confession franche, en la face de l'Eglise, obtindrent pleine guarison de crimes si enormes, & en furent lauez deuant Dieu, Or voila les bornes de l'office des Pasteurs, ou s'arrestans (sans vsurper la dignité des Magistrats) ils peuuent estre asseurez que Dieu les remunerera d'une gloire speciale, en la beatitude celeste, les faisant reluire comme les estoiles du firmament. Et mesmes accompagneront ses saints Apostres, qui seront au dernier iour assis sur douze Throsnes, pour iuger les douze lignees d'Israel. Pourueu qu'en seruant ainsi qu'ils ont fait à son Eglise, ils ne desdaignent de s'assubieoir aux Magistrats. A quoy ils doyuent facilement

ployer: considerans que la gloire terrienne; semblable à la fleur de l'herbe, n'est que d'un iour au prix de l'éternité celeste. Se representans que l'humilité ou Dieu les a voulu ranger en ce monde, pour les rendre grands en son Paradis, n'est que selon l'ordre establi en nature, qui donne de petits commencemens aux choses qu'elle veut amener aux grandeurs les plus apparentes, comme aux Chênes, & Hêtres, qui de petits commencemens & avecques peu d'aduancement, premièrement à vne grandeur tres-perdurable. Là ou la Citrouille, & le Senneué s'esleuans incontinent, sentent tout aussi tost les effects de leur destruction, à la premiere froidure. Et partant si les Pasteurs trouuent de la difficulté à se ranger à seruir l'Eglise, & se soumettre aux Magistrats, qui iettent l'œil sur ceste Couronne incorruptible de gloire, qui les attend là haut au ciel, pour leur faire aualler telle amertume.

Que Christ est le Chef de l'Eglise, & comme les hommes ne sont propres à telle dignité.

IL est requis à present de confuter les arguments dont se sont voulu fortifier les Ecclesiastiques, pour ranger les Magistrats en degré inferieur d'eux. En premier lieu, ils prennent cest argument, qu'ainsi que les Monarchies tomberoyent en decadence sans Chef, aussi pour maintenir l'Estat de l'Eglise

il y en doit auoir vn, ce que ie leur confesse.
 Mais puis que Sainct Paul tesmoigne en l'E-
 pistre aux Ephesiens, que Christ est le Chef *Ephes. 5.*
 de l'Eglise, comme vne dignité inseparable de *Colloss. 1.*
 son office de Redempteur, on n'en peut met-
 tre d'autre sans le reietter, ou vouloir rendre
 le corps de l'Eglise monstrueux. Il y a plus,
 c'est que l'homme mortel & terrestre ne peut
 estre Chef de l'Eglise, dont le corps est cele-
 ste, diuin & spirituel, & est Iesus Christ seul
 propre à exercer telle dignité. Veu que sa ver-
 tu diuine luy rend toutes choses presentes,
 qu'il ne peut errer, ni estre vaincu, (ainsi qu'il
 en est adueni en plusieurs Papes) & que
 Dieu veut son Eglise estre gouuernee en for-
 me d'Aristocratie: ainsi que du temps des
 Iuges. C'est pourquoy Sainct Paul, au mes-
 me lieu dit, que Christ en a mis les vns Apo-
 stres, les autres Euangelistes, & les autres
 Pasteurs, pour l'edification de l'Eglise, sans
 en auoir preferé vn aux autres. Et quand il
 falloit donner quelque ordre en l'Eglise, le
 tout se dispoisoit par l'aduis du peuple. Com-
 me quand Matthias fut surrogé au lieu de Ju-
 das qui auoit trahi son maistre. C'est pour-
 quoy Gregoire, Pape, disoit qu'il n'y pou-
 uoit auoir d'homme pour Chef en l'Eglise,
 pource (dit il) que s'il tomboit en heresie elle
 en seroit toute corrompue. Et pour monst-
 rer qu'un homme qui a prins telle qualité peut
 tomber en heresie, il la prouue par l'exemple
 de Nestorius & Macedonius, heretiques, que
 l'on auoit esleuez pour Chefs sur l'Eglise de

Constantinople. Parquoy estant Iesus Christ Chef spirituel, inuisible, & celeste, qui est de la qualité de l'Eglise, on n'y en peut mettre d'autres sans la rendre difforme. Et est vn vain subterfuge, de dire qu'on ne met qu'un chef ministerial, qui vaut autant à dire que de seruice, pource que cela est du tout repugnant à la nature & propriété d'un chef, qui doit tousiours tenir le plus haut lieu, & auoir la maistrise & conduite sur le reste du corps, ou autrement, ce titre de chef ne luy peut appartenir : & ne faut point en surroger au Fils de Dieu, veu qu'il a promis d'estre avecques son Eglise iusques à la consommation du monde. S'ils repliquent qu'il ne se rend visible à tous, comme le Pape, ie leur responds que le Pape ne se monstre qu'à ceux de Rome, & des environs. Et que ceux des Indes, & d'Ethiopie ne le voyent non plus que Iesus Christ. Que s'ils me respondent que sa dignité est pour ordonner sur la pollice externe de l'Eglise, & gouvernement ciuil. Ie replique là dessus que les Roys & Magistrats sont ordonnez de Dieu pour chefs sur telles parties : ainsi qu'il a esté monstre en la personne de Moyse, & autres Roys, tant de l'ancien que du Nouveau Testament, qui ont tenu le plus haut lieu en l'Eglise, du consentement des Prestres & Sacrificateurs. Parquoy comme les Apostres, ne se sont attribuez qualité de Chef, aussi ne doyuent ceux qui sont moindres qu'eux, par leur confession mesme, en ce qu'ils s'appellent seruiteurs des seruiteurs.

*Que c'est vne erreur trop grossier que de penser
que l'Eglise de Dieu soit edifiee
sur saint Pierre.*

Quand à ce qu'ils font bouclier de ce que Iesus Christ dist à Sainct Pierre, Qu'il estoit pierre, (aprez qu'il eut confessé qu'il estoit le Christ le Fils de Dieu) & que sur ceste pierre il edificeroit son Eglise. Ces mots sont en Latin tels, *Tu es petrus & super hanc petram edificabo ecclesiam meam*, Qui demonstrent que cela estoit dit du Fils de Dieu, tel confessé par Sainct Pierre: Car il eust dit *super se*, & non pas vsé de ce mot *petram*, qui est de féminin genre, & *Petrus*, nom d'homme, de masculin. Parquoy son but tendoit là, que l'Eglise deuoit estre edifiee sur celuy qui estoit aduoué pour Fils de Dieu. Qui est appellé aux Pseaumes, La pierre que les edificans ont reprouuee. Ce que le mesme Apostre a interpreté au second chapitre de sa premiere epistre, quand referant l'Ecriture, & appliquant ce qu'elle dit de la pierre Angulaire à Iesus Christ, il dit, Voici ie mets en Sion la principale pierre du coin, esleuë & precieuse: & qui croira en elle ne sera point confus. Et aussi quelle plus absurde interpretation pourroit estre trouuee, que l'Eglise fust appuyee sur vne creature pecheresse, incontinent apres appelée Sathan, par Iesus Christ mesme: lequel l'a renoncé à la parole d'une simple chambriere, par trois fois. Dauantage, ce que l'Eglise est sanctifiee, c'est d'autant qu'elle est

edifiee pour maison spirituelle, ainsi que pierres viues, pour adherer à Iesus Christ, comme edifiee sur luy. Et comment pourroit desia estre l'Eglise edifiee au ciel, si elle estoit fondee sur Sainct Pierre, veu que son corps n'est encores ressuscite? Ainsi que plusieurs reliques qui se trouuent, tant à Rome que ailleurs, en rendent ample tesmoignage. Parquoy estant telle interpretation amenee contre l'autorité de Sainct Pierre, il doit estre reietté. Et entant que la puissance de lier & de deslier, rien ne luy a esté concedé, qui ne soit commun à tous Pasteurs. D'autant que par la Parole de Dieu ils peuuent declarer que ceux qui croiront au Fils de Dieu, & feront fruiets dignes de penitence, & dilection de leur prochain, sont par adoption heritiers du Royaume de Dieu, comme transferez de la mort à la vie. Comme d'autre costé ceux qui ne croiront en luy sont desia condamnez. Et dauantage, que ceux qui de bouche dient croire en Dieu, & par toutes actes d'iniustice & impeté le renient, qu'ils n'heriteront point le Royaume de Dieu. Estant tres-certain que encores que telles paroles soyent prononcees par vn fidele, n'ayant qualité de Pasteur, elles seront ratifiees au ciel: d'autant qu'il ne parle point de luy mesme, mais comme les paroles de Dieu, par lesquelles le monde sera iugé. Et partant cela ne peut en rien rendre l'Ecclesiastique, qui se dit superieur des Magistrats, veu que l'Apostre Sainct Pierre les a entierement despouilleez de toute domina-

tion, & assubiectis à tout ordre humain, & à honorer le Roy.

*Confutation de l'argument des Pasteurs prins
de la recognoissance publique de
Theodose. pour defendre
la preference qu'ils
affectent.*

MAis pource qu'il n'y a argument qui face plus leuer les cornes, tant aux Pasteurs Catholiques que Ministres, & ou ils conuiennent tant, quand ils veulent triompher des Magistrats, que de leur représenter l'exemple de l'Empereur Theodose, qui s'humilia deuant Dieu & son Eglise, obtemperant au conseil de Sainct Ambroise, pour demander pardon de son peché. Pource que par là ils aspirent persuader que les Roys & Magistrats se doyuent assubiectir à eux. A quoy pour respondre ie pourrois dire que c'est mal argumenté, que d'un fait particulier, en tirer vne conclusion generale: & leur opposer l'obeissance vniuerselle de tous les premiers siecles des Ecclesiastiques aux Magistrats, qui seroit bien d'un plus grand poids. Mais pour ne m'y arrester plus longuement, & venir à sainct Ambroise, qu'est-ce qu'il a entrepris sur cest Empereur, sinon l'office d'un bon medecin & ambassade du Dieu Souuerain, luy ayant remonstré la grandeur de son mal, d'auoir respendu tant de sang Chrestien? En quoy il auoit violé les loix de nature, celles du

Dieu viuant, & les Imperiales mesme, à cause dequoy il auoit allumé le courroux de Dieu contre luy & sa maison: & s'estoit rendu odieux généralement à tout son peuple, & en scandale à son Eglise. Luy enseignant par vn mesme, le moyen de recouurer guarison, & pardon d'un peché si estrange & enorme: Luy remonstrant que d'autant que sa faute estoit detestable, aussi s'il en vouloit, pour tesmoignage de sa penitence, faire vne Reconnoissance publique, cela luy seroit autant honorable. Il acquiesce à ce conseil, regardant que ce Pasteur ne parloit de luy mesmes, & n'estant fondé en doctrines humaines, s'estoit reuestu de la seule & pure parole de Dieu. A laquelle voulant obeir il suit ce conseil, ainsi qu'auoit fait Dauid qui suyuit l'admonition du Prophete Nathan. Mais que pour cela Dauid ne Theodose ayent aucunement assubiection leurs Sceptres sous eux: ou bien que tels Pasteurs se soyent voulu distraire de leurs subiects, cela ne se trouuera nulle part. En somme il ne s'est iamais trouué de medecins corporels si effrontez, que pour auoir les Roys & Magistrats, obeir à leurs conseils, & esté guaris de leurs maladies, qui en ayent voulu inferer quelque presceance & superiorité. Qui est pour monstrier qu'il n'y a si leger argument que l'Ecclesiastique n'embrasse, pour se preualloir à rabbaissier l'authorité des Magistrats.

Que pour reigler ou reformer l'Eglise tous estats
 y doyuent estre appelez, comme y a-
 yans pareil interest, & que
 c'est aux Magistrats à
 y tenir la pre-
 sence.

ET pour n'obmettre rien de tout ce qui
 peut donner quelque couleur à la preemi-
 nence qu'ils affectent, ils obiectent qu'ainsi
 qu'il est requis en tous estats quelque disci-
 pline qui serue comme de nerfs pour les en-
 tretenir, à plus forte raison en doit-il auoir en
 l'Eglise, qui doit estre mieux policee que nul
 autre. Ce que ie n'ay besoin de denier, pour
 ce que soyent veus tous les escrits de la Bi-
 ble, & il s'y trouuera plus de reigles pour le
 deuoir des Pasteurs, & entretien de l'Eglise,
 que pour tous autres estats du monde, ou il
 se trouuera vne telle perfection que nul ne
 les a encores peu obseruer. Et si tous Pasteurs
 ne sont capables de les apprendre, que les plus
 aduancez en fassent des extraits de ce qui sert
 à ce suiet, pour les y soulager. Je leur conce-
 deray encores dauantage, c'est qu'au temps
 que les Magistrats sont persecuteurs de l'E-
 glise, & que le corps d'un peuple en est enne-
 my: Comme du temps des Apostres, les Pa-
 steurs & Prestres de l'Eglise, peuuent bien
 par l'aduis d'icelle, establir quelque ordre en-
 tre-eux, comme d'uiour & heure que lon se
 doit assembler pour le seruice diuin, predica-
 tion de sa Parole, & administration des Sacre-

ments, de la forme qu'on doit communiquer au Sacrement de l'Eucaristie, soit debout ou à genoux, si vn seul doit reciter les prieres, estant suyui en l'esprit de tous : ou si les vns doyuent commencer, & les autres respondre. Ce que ie n'appelle loix ni ordonnances humaines, pource que cela n'est qu'un certain ordre, qui ne lie les consciences, & peut estre changé pour la circonstance des lieux. Mais neantmoins ie di que depuis que le Magistrat s'est rangé deffous le Sceptre de Iesus Christ, nul ne doit entreprendre sur son autorité, à laquelle tous doyuent deferer. Lequel aussi de son costé ne doit à son appetit particulier gouverner l'Eglise, ny la tyrannizer: mais par vn bon consentement, avecques les Pasteurs, les Nobles, & le peuple, à l'imitation des Apostres, aduiser à toutes necessitez & ordre qu'on y peut requerir: En y interposant son autorité, & gardant le rang de pre-sceance qui luy appartient. C'est pourquoy puis que en la France, Allemagne, Angleterre, & Espagne, qu'il se fait des assemblees d'Estats, & Diettes: non seulement generales, mais aussi particulieres, pour chasque province, ou se trouuent des Gouverneurs, ou Iuges des plus signalez de la iustice, les Ecclesiastiques, les Nobles, & le peuple, representant le corps des Royaumes ou Prouinces: comme aussi des Eglises, quelles assemblees ni lieux plus conuenables peut-on trouver pour pourueoir à ce qui est necessaire d'establir, & ce qui concerne l'Eglise, selon ceste

reigle commune: que ce qui touche à tous, doit estre approuué de tous? N'est-ce point vn reiglement plus beau & loüable, que celuy qu'ont par cy deuant pratiqué les Ecclesiastiques, qui ne representans qu'une partie de l'Eglise, & comme seruiteurs en icelle, ont vsurpé tant de prerogatiues, que de se reserver cela à eux seuls, & en forclorre les autres estats, en tenant leurs conuenticules à part: Quoy que les autres estats ne leur ayent oncques donné occasion, ne exemple de ce faire, ne s'estant oncques congregez qu'ils ne les y ayent les premiers appellez. Parquoy fil est ainsi que les Pasteurs trouuassent estrange qu'on les laissast en arriere, quand il faut pourueoir aux affaires d'Estat d'une Prouince, ou reformation des Coustumes, ou plusieurs peuples les ont delaissez. Pourquoi osent-ils entreprendre à traiter du salut commun, en delaisant les autres estats, qui y ont pareil interest qu'eux? Attendu qu'enuers Dieu il n'y a point d'acception de personnes. *Rom. I.* Parquoy puis-que tous sont membres du corps mystique de Iesus Christ: & comme citoyens du Royaume des cieux, il est tresraisonnable que tout se manie par vn bon ordre & consentement mutuel. Sans que les Ecclesiastiques ayent des assemblees à part, pour y excogiter & introduire nouuelles inuentions, au preiudice du peuple, & deshonneur de l'Eglise: auquel, par leurs paroles & persuasions de grande eloquence dont ils sont remplis, facilement ils font tout approuuer:

voire autant ce qui luy est contraire que salutaire.

*L'ignorance des Magistrats de ces derniers
temps, cause que l'Ecclesiastique
les a ainsi r'aualléz.*

SUr ce pas, il faut que ie m'esleue, pour, non seulement accuser, mais aussi condamner l'ignorance, ou plustost la negligence des Gouverneurs & Magistrats de ces derniers temps, lesquels n'estans plainement instruits de la preeminence de leurs charges, ne du premier rang d'honneur, ou ce grand Dieu de gloire les auoit hautement colloquez, pour les faire participans de l'Empire vniuersel qu'il a sous le pourpris des cieux, s'en sont laissez deietter par l'Ecclesiastique, pour les fouler aux pieds. Ainsi que cela s'est executé sur le plus apparent d'entre-eux. Se laissant persuader que cela se faisoit, comme representant (l'Euesque de Rome) Iesus Christ & Sainct Pierre: qui se sont abbaisséz iusques au centre de la terre, pour les esleuer & les faire honorer à tous. Est-ce l'instruction? est-ce l'exemple que leur en a representé par l'vniuers ce diuin Moyse? ce celeste & Royal Prophete Dauid? & le sage Salomon avecq' sa grande magnificence? Ce Gouverneur Daniel, tressainct Prophete? & ce Iuge Samuel? N'ont-ce pas esté autant de grands Soleils, par la resplendeur desquels tout ce que les Prestres de leur temps pouuoient auoir

de clarté, s'est incontinent disparuë, ne plus ne moins que celle des Estoiles, lors que se represente en nostre Horizon ce lumineux roy des Planettes, le Soleil? Que si nous sortons hors de ces bornes pour ietter nos yeux sur les Payens, quelle proportion de gloire peut estre trouuee entre Theseus, premier Gouverneur d'Athenes, Pericles l'eloquent, Phocion, & Symon, Chefs & conducteurs de ce peuple, Aristide le iuste Iuge, & Demosthenel'Orateur, & ce qu'il y auoit lors de Sacrificateurs, & Prestres d'Idoles, il est certain que autant que la lumiere des estoiles fixes du ciel azuré, outre passe celle de nos sieges, autant a excellé le celebre renom de tels Magistrats: celui de leurs Ecclesiastiques. Que si de là nous contemplons la reputation immortelle, ayant accompagné vn Romule, fondateur de Rome, Numa Pompilius, Camillus, les Scipions, Luculle, Pompee, Auguste, Caton, Ciceron, Traian, Marc Aurelle, Iustinian, Belisaire, & autres Gouverneurs qui leur ont assisté, dont les rares vertus, comme de Sagesse de Force, Iustice, & Magnanimité ont esclairé tout l'yniuers, ainsi que torches flamboyantes parmi l'obscure confusion des affaires humaines. Et que de là nous contemplons par mesme moyen, la qualité des faux Sacrificateurs qui regnoyent de leur temps, & leur memoire, il n'y apparoistra pas moindre difference qu'entre quelque tyson fumant, & la claire lumiere dont chasque matin est esclairante l'estoile nommee Venus: &

l'Auroré, comme avant-coureur du beau & esclairant Soleil.

Fin artifice de l'Ecclesiastique d'auoir fait croire aux Magistrats que ce n'estoit leur estat d'apprendre l'Ecriture, & qu'ils s'en deuoyent reposer sur luy.

OR qui de là voudra sans passion aduertir à l'Estat desplorabile de nostre infortuné siecle, il verra toute ceste resplendissante dignité des Magistrats tomber en si extrefme decadence, que plusieurs despereront qu'elle se puisse relener. Et le plus grand obstacle qui se presente, c'est l'ignorance: d'autant que au lieu que tous ceux dont i'ay parlé surmontoient d'une grande distance en sçauoir, tant pour la pieté & religion, que ce qui despendoit de la pollice en affaire d'estat. Les Pontifes & Prestres de leur temps, & la pluspart de ceux de ce siecle, n'en sçauent qu'autant qu'il plaist aux Ecclesiastiques leur en faire cognoistre & suggerer, les ayant imbuez de ceste erreur, que ce leur est vne louange de ne se donner peine d'en rien apprendre, pour se arrester du tout à ce qu'il plaira aux Pasteurs leur faire croire & donner à entendre. Voila pourquoy ils ne gouuernent pas tant que fait l'Ecclesiastique par eux, leur ayant r'auallé le courage si bas, qu'il peut disposer d'eux du tout à son desir. Ce qui est cause qu'en contre-

uenant à sa profession, qui requiert de procurer par tous moyens la paix, la chercher, & la pourfuyure, il ne fait cas d'allumer guerres ciuiles, embrazer haines mortelles entre les peuples, & de vomir tous opprobres contre Roys & Potentats, proposer menfonges, & interpretations si fausses que les Diables mesme en auroyent honte. En quoy faisant il a tellement r'abbaisé le courage des Magistrats de ce temps, embaiïonné leurs bouches, & emmeniclé leurs mains, qu'ils n'oseroient remonstrier aucun signe de leur oser contredire. De sorte que toute ceste magnanimité dont valcureusement ils combattent leurs ennemis armez, les abandonne tellement contre ceux-ci, que seulement ils n'oseroient les attaquer. Et d'ou procedent si estranges effects ? sinon de ce qu'ils ne sont pas bien informez de la preeminence & du rang qui leur appartient, qui est semblable au corps de toutes Republicques, à celuy que la teste & intelligence qui y a son siege, doyuent auoir sur la volonté & membres du corps, tant pour leur estre soumis, que pour participer dauantage de l'image de la diuinité. Et pourtant, non seulement les Roys & les Princes doyuent se maintenir au plus haut siege ou le Souuerain les a colloquez: Mais aussi doyuent retenir toutes autres vocations en leur ordre, si que les membres d'un mesme corps, sans que l'un entreprenne sur ce qui appartient à vn autre, pour luy raurir ce qui despend de son office, ou luy oster ses biens.

Et pource que les Pasteurs de l'Eglise ont esté de tout temps plus difficiles à y ranger. C'est pourquoy tous Magistrats doyuent bien plus curieusement y auoir l'œil qu'aux autres Estats. Voila pouequoy aprez auoir pourueu qu'il soit honnestement entretenu, en luy assignant bons gages, il doit curieusement prendre garde qu'il ne butine la substance des autres membres, par la fertilité de ses inuentions, comme par donations & laiz testamentaires, fondees sur les prieres des morts, lors que pour l'espouuamment de la mort, ils peuuent tourner la volonté du malade à consentir tout ce qui luy est de leur part proposé. Sur quoy i'aduertiray que neantmoins que ie ne condamne telles prieres, pourueu qu'elles se facent pour la dilection de Charité qu'on a portee aux defuncts, continuante sur leur memoire. Si est ce que si on les applique pour despouiller les vefues & orphelins, des meubles qui leur estoient requis pour leur entretien: pour remplir vne conuoitise desreiglee de gaing, qui possede grande partie des Pasteurs. Ie ne puis approuuer que ce soit vn iuste moyen de se rendre seigneur de tel bien. Car s'il est ainsi que Dieu requiert que les gens de guerre se contentent de leurs gages, combien plus le doit pratiquer l'Ecclesiastique, qui doit estre miroir de toute sainteté, s'en doit contenter?

Que

*Que les Potentats de ce temps ont vn beau ſuiet de
gloire ſ'ils recourent leur prerogative
que ceux ou ils ont ſuccedé
ont perdue.*

OR en ce lieu i'aduertiray le lecteur, que ce que ie propoſe pour le regard des Magiſtrats, n'eſt pour vouloir maculer d'aucune contumelie ceux qui y ont eſté appelez de ce temps: d'autant que l'ordre qu'ils ont obſerué n'a eſté que pour vouloir ſuyure les traces & ſentiers que ceux qui les ont precedez en telles charges leur ont moſtree, qu'ils n'ont voulu outrepaſſer. A raiſon dequoy i'impute pluſtoſt ce mal à l'imbecilité de noſtre ſiècle, & à ceux qui auoyent telles charges aux republiques, lors que l'Eccleſiaſtique commença à ſ'eſleuer par deſſus eux, qu'à ceux qui leur ont ſuccedé, pourueu que d'vne ferueur ardente de courage, embrassans ceſte inſtruction, on les voye ſ'eſuertuer de regagner ceſte honorable preeminence, dont les Paſteurs ſubtilement les ont depoſſedez, qui leur eſt vn bel obiect pour ſ'acquérir vn redoublement de gloire: quand par leur prudence & magnanimité ils auront recouuert la preeminence dont leurs maieurs auoyent eſté depoſſedez. Semblablement quand ie traite de la ſimplicité des Paſteurs, & de la preſſeance des Gouverneurs & Iuges, ie n'entens par cela r'abbaiſſer ceux qui pour eſtre Princes, ou iſſus des maiſons plus illuſtres de la Chreſtienté, peuuent en cōſideration de telles qualitez, cōſeruer leurs

presceances. Mais i'entens enseigner que pour le regard de la qualité d'Ecclesiastique il n'y a aucune raison de chercher vne gloire & ambition caduque & transitoire, veu qu'elle leur doit faire mespriser, pour les amener à vne vraye & non feinte humilité, afin de condamner la conuoitise ambitieuse de plusieurs Prelats, qui aux assemblees d'estats veulent par brauerie prendre la presceance par dessus les Magistrats, comme entreprenans faire choses du tout repugnantes à leur vocation, à la doctrine & exemple qui leur en a esté donné par le Fils de Dieu : le souuerain & bon Pasteur, (qui estoit esgal au Père) par ses Apostres, & tous autres ayans exercé ceste charge en l'Eglise primitive, ou elle a esté tres-fleurissante, pour les ramener à l'ordre que Dieu a premierement establi, afin qu'ils se parent à l'aduenir d'humilité.

*Déclaration des causes qui nous ont engendré ce
désordre & les miseres ou nous
sommes tombez.*

IL ne reste à present qu'à declarer la cause de l'abbaisement des Magistrats, ou nous n'en trouuerons d'autre, sinon vne negligence d'auoir d'eux-mesmes diligemment leu la Parole de Dieu, ainsi que Dieu le requiert d'eux, & retenu les passages & exemples concernas la preeminence & leurs charges. Comme aussi faute d'auoir establi ce bel ordre, que nul ne fust auancé à charges si dignes auant que d'e-

Deut. 17

estre examiné, pour veoir s'il estoit instruit sur ce qui appartient à son office, du rang qu'il deuoit tenir, & s'il le pourroit bien defendre contre l'Ecclesiastique, s'il auoit leu la Bible plusieurs fois, & s'il auoit cote ou extrait les passages traitans de la preeminence & deuoir des Magistrats, & s'il ne l'auoit fait, le renuoyer pour l'apprendre auant que de l'admettre. C'estoit là ou il falloit sonder ceux qui y vouloyent entrer, & principalement ceux de longue robe, plustost q̃ sur questions legeres des actiōs & voyes de commencer de poursuyure quelques procez. Selon ceste diuine & tres-vraye sentence, Cherchez premierement le Royaume de Dieu, & toutes choses vous seront adioustees. A l'exemple des Magistrats compilateurs du Code, qui y estoient fort auancez. Et s'esleueront au iour du Iugement contre nous, les Payens de ce Royaume tant bien policé de Lachine, qui n'admettent aucun Gouverneur ne Iuge, qui premierement n'ait esté diligemment inquis par vn visiteur, pour cognoistre s'il est reuestu de sçauoir, & doué des vertus requises pour l'administration de telles charges. Or pource que par l'infelicité de ce siecle beaucoup sont entrez en ces offices sans auoir eu telles parties, ne estre examinez, voila pourquoy desirant suppleer à ce defect, i'ay le plus briefuement qu'il m'a esté possible dressé ce traicté, par lequel en moins de quatre iours, ils pourront comprendre la preeminence, honneur & deuoir des charges dont le Tout-puissant les a voulu honorer,

pour luy en rendre action de graces, & s'em-
 ployer à ce qui despend d'icelles : pour leur
 preparer la voye à lire l'Escripture, pour en e-
 stre encores mieux instruits & asseurez : afin
 de se fortifier, & esleuer leur courage, pour
 reprendre leur rang, sans souffrir que les Pa-
 steurs se preferent à eux, pour disposer de l'E-
 glise à leur volonté, ne qu'ils allument sedi-
 tions, haines, guerres, & cruautéz comme ils
 ont fait pour le passé: comme actes indignes,
 & du tout repugnans à leur profession, & aux
 exemples des saincts Prophetes & Apostres.
 Et qui plus est, s'ils sont si impudens que de
 proposer fausses doctrines & interpretations,
 les reprendre deuant tous, avecques mena-
 ces de les chasser s'ils ne s'en changent à l'ad-
 uenir. Car si saint Paul a eu vn si magnani-
 me courage que de reprendre Saint Pierre,
 ce grand Apostre, deuant tous, pour vne le-
 gere faute, se doyuent monstres les Magi-
 strats si pusillanimes, de ne l'oser entrepren-
 dre contre les simples Pasteurs de ce temps,
 quand ils profereront mensonges, qui sont du
 dyable, pour abuser l'Eglise, ou doit regner
 la verité?

*Remedes conuenables, tant pour establir vn bon
ordre, que pour preuenir qu'on ne
retombe aux miseres ou
nous sommes.*

A R T I C L E.

Que si chacun auoit estroitement entretenu son rang, ainsi qu'aux premiers aages, d'or, d'argent, & airain: & aux trois premieres Monarchies, & commencement de la quatrieme, en laquelle nous sommes de present tombez, ausquels les Magistrats auoyent commandement de presceance sur tous autres estats, Ceste Republique Chrestienne oncques n'auroit esté precipitee au comble des maux, desquels elle est presque abismee, pour les fautes de ces ambitieux Pasteurs: l'ayans contre le deuoir de leurs charges, remplie de haines, meurtres, massacres, & autres tragiques spectacles: Ayans commencé dès eu precedent le regne du Roy Sainct Loys, au pays des Albigeois, & continué iusques à present, pour la grande crainte qui les tourmente d'estre despouilleez de leurs immenses richesses, & de leur vsurpee preeminence, ou leur conscience les condamne comme vsurpateurs, & possesseurs de mauuaise foy. Mais qui voudra preuenir qu'un si piteux desastre ne destruisse la posterité. Il est tres-necessaire que ceux qui esperent que leurs enfans seront esleuez Magistrats, ou Gouverneurs, & qui n'ont intention de les

d iij

rendre consommez aux sciences, qu'auant toutes choses ils leur fassent apprendre l'histoire sainte du vieil & nouveau Testament, avecques les passages qui peuvent seruir à maintenir la dignité de leurs charges: & rengier l'Ecclesiastique à se contenir en la sienne, pour leur faire teste. En cas que selon leur coustume ils vueillent tout troubler. Afin que imitans ce vray & fidele Magistrat Moyses, David, Salomon, Daniel, Iosué, Samuel, Iosias, Ezechias, & autres, ils soyens plus entendus & scauans au fait de la Religion & au seruice de Dieu, que non pas les Pasteurs. Car quiconque desirera estre instruit de luy, & se rendra docile & tremblant à sa Parole, sans la faire seruir à se fortifier en ses conceptions. Il est certain que son esprit luy fera pour docteur, & mesme luy reuelera la volonté du Createur, & ne leur faut douter que ainsi que du temps de l'ancien Testament les Magistrats ont surpassé les Prestres en l'intelligence de sa Loy, & les ont tousiours reformez: que Dieu ne leur face encores à present de pareilles, ou plus grandes graces, pour se maintenir en leur autorité. Mais s'ils se rapportent aux Ecclesiastiques de les instruire, ils ne manqueront par subtils artifices d'obuiuer à cela. Et au lieu de la volonté de Dieu, ils leur imprimeront si auant celle des Ecclesiastiques, qu'il sera tres-difficile de les en retirer.

*Exhortation aux humbles Pasteurs qui ne se
se sont laissez emporter à la gloire du
monde, de se ioindre aux Ma-
gistrats, & s'opposer con-
tre l'ambition des
autres.*

ET pour faire fin il faut que i'adresse ma
parole à tous Prestres, Moynes, & Do-
cteurs, pour les admonester de regarder la
briefueté de ceste vie, dont la gloire est sem-
blable à la fleur de l'herbe. Et que pour s'em-
parer de choses si perissables, comme sont les
presceances qu'aucuns pretendent, mieux
leur vaudroit n'auoir iamais esté que de trou-
bler de ceste façon les Royaumes Cbre stiens,
& la paix de l'Eglise, qui leur deuroit estre en
plus grande recommandation que leurs pro-
pres vies, sans s'oublier tant que pour l'affe-
ction de leur gloire particuliere, ils procurent
vne subuersion entiere, ou Dieu par son iuste
iugement les fera perir avecques les autres.
Et partant puisque tous hommes de bon &
sain iugement, qui ont leu les histoires de ces
derniers temps, peuuent rendre bon tesmoi-
gnage que toutes les haines, diuisions & guer-
res, qui depuis quatre cents ans ont regné par-
mi la Chrestienté, ne sont procedees d'ail-
leurs que de l'ambition desordonnee, & Con-
stitutions des Ecclesiastiques, que grande
partie du corps de l'Eglise n'a plus voulu souf-
frir, ni porter, que de leur part & ceux qu'ils
ont retenus à leur deuotion, n'ont voulu en
f iiii

riens reformer, mais plustost accroistre & ad-
 uancer. Voila pourquoy ie desirerois que
 tous humbles Pasteurs qui ne se sont laissez
 vaincre à vn si diabolique orgueil, confide-
 rassent que puis que l'ambition des autres
 leur est odieuse, qu'ils ayent à regarder que
 fil falloit separer ces glorieux d'avecques les
 simples & modestes, qu'il s'en trouuera de ce
 dernier nombre cent contre vn, si à leur qua-
 lité que c'est sur eux ou l'Esprit de Dieu repo-
 se, qu'ils sont plus grands & agreables de-
 uant luy, ses Anges, Cherubins, & Archan-
 ges, que les autres qui ne cherchent que gran-
 deur & estre Legislateurs, pour eterniser leur
 memoire en terre, sans se donner peine de
 troubler l'Eglise, & faire ruiseler le sang chre-
 stien sur tel suiet: mais qu'ils soyent aduertis de
 s'eslongner du danger: qu'ils remarquent aus-
 si qu'en sçauoir & bonne vie, tels superbes
 leur sont de beaucoup inferieurs. Et que par
 la sentence du Fils de Dieu ils sont des à pre-
 sent & seront au iour du Iugement declarez
 plus grands que ceux-la. Voila pourquoy
 quand ie voy reluire vne humilité en la plus-
 part des Theologians des Vniuersitez, aux
 Curez des champs, & simples Prestres, & sur-
 tous aux ordres des freres mineurs, quoy
 qu'on n'en face que peu d'estat, au prix des
 Euesques, Abbez, Officiaux, leurs grands vi-
 caires, Doyens, & Archediacles, grandement
 alterez des presceances, opulences, & gran-
 deurs terriennes. Pour tout cela i'honoreray
 & tiendray ceux qu'on repete les plus petits,

pour les plus grands, & plus agreables à Dieu. Suyuant ce que la Sageſſe & verité de Dieu eternelle en a prononcé. Parquoy vrais Pasteurs, reputans voſtre parure d'humilité plus belle que toutes grandeurs & richesses, pour obtenir vne couronne immortelle, esuertuez-vous pour vous lier ensemble, desployans voſtre ſçauoir & eloquence, pour crier à gorge deſployee contre la hauteſſe de ceux, qui au lieu de demeurer en voſtre rang, comme vos freres, ont voulu eſtre ſemblables aux Roys & Dominateurs de la terre, pour vous meſpriſer ainſi que vils ſeruiteurs, ou eſclaves: en regardant que leur inſatiable conuoitiſe de richesses, ont tant eſpuisé l'Eglise de ſes reuenus, qu'il ne vous en reſte que pour viuoter petitement en l'exercice de vos traux, dont ils n'ont ceſſé vous ſurcharger pour immortalizer leurs memoires. Vous couriez bien il y a trente cinq ou quarante ans, mais la diuiſion qui eſt aduenue à cauſe des Miniſtres vous a retardez de voſtre courſe, ou vous pouuez r'entrer à preſent: car vous ne deuez pas craindre les excommunications du Pape, ainſi que du temps qu'il excommunia les freres Mineurs, pour auoir condamné la grandeur & opulence de l'Eccleſiaſtique: car vous auez voſtre Roy de France, ſes Parlemens, & Gouverneurs qui vous ſeront pour rampart & deſenſe. Parquoy en vous conioignant à eux, publiez l'honneur & obeiſſance qu'on doit au Roy, & à ceux qui ſont enuoyez de par luy: & en ce faiſant ils vous re-

cognoistront sans vous laisser manquer de
 moyens, pour viure trop plus honnestement
 que n'avez fait pour le passé. Chassez ces faus-
 ses deffiances du Roy, comme immuable,
 tref-ferme & veritable en ses promesses, que
 si vous suyuez ce conseil, i'espere moyennant
 la benediction du Tout-puissant, qui donne
 grace aux humbles, que tout ainsi que l'or-
 gueil de ces Pasteurs ambitieux nous a fait
 plonger en vn deluge de maux: aussi que vo-
 stre humilité apportera vn reestablissement
 tref-heureux en tous estats, & conuertira du
 tout ce siecle calamiteux en vne paix & feli-
 cité admirable. Je prieray le Seigneur par sa
 misericorde infinie qu'il vous en face la gra-
 ce. Amen.

F I N.

TABLE DES CHAPI-

TRES CONTENVS

en ce liure.

- Liaison de ce traité avecques celui du Royal François de la subtilité des Italiens.* Pag.1.
- Briefue enumeration des arguments par lesquels l'Ecclesiastique pretend tenir rang par dessus toutes les principante^s du monde.* 2.
- Recueil des plus fortes raisons opposees pour la preeminence des Magistrats par dessus tous autres estats.* 3.
- Belle approbation de la dignité des Magistrats, en ce que le Createur du monde a le premier exercé ceste charge.* 4.
- Comme Dieu pour honorer ceste vocation, a luy mesme appellé le premier Magistrat de son Eglise.* 5.
- Description de la personne d'Aaron, & de l'excellence & splendeur de sa vocation.* 6.
- Effects admirables de la puissance diuine pour sanctifier Moysse & sa vocation, & l'esleuer par dessus toutes autres.* 7.
- Singuliere prerogatiue de Dieu enuers Moysse, l'ayant seul fait monter à luy pour bailler par sa main la Loy morale, iudiciaire & ceremoniale.* 9.
- Moysse employé par l'Eternel, pour prescrire la forme de luy sacrifier, & des accoustremens des Sacrificateurs.* 10.
- Rayons de la lumiere diuine en la face de Moysse, tesmoignages qu'il representoit en sa charge la personne de Dieu, & que ses loix sont du tout diuines.* 11.
- Comme le Fils de Dieu ayant exercé l'une & l'autre*

charge, a pourtrait la forme comme elles doyuent estre exercees. 12.

Continuation des effects de la puissance diuine sur Iosué, & de l'honneur que Dieu luy fait ayant succédé à la charge de Moÿse. 14.

Les Magistrats tousiours presereZ aux œures les plus signalees pour l'establissement du seruice diuin. 15.

Confirmation de ce que dessus en ce que les Payens n'ayans que la lumiere naturelle ont pratiqué les mesmes choses. 16.

Comme les Magistrats sont ordonneZ de Dieu pour restablir son seruice de la corruption des Pasteurs, & det calamitez qui arriueront quand ils vsurperont leur lieu. 18.

Exemples des faueurs de Dieu quand les Pasteurs se sont contenus aux limites de leurs charges, & de son ire quand ils s'en sont destourneZ. 19.

Probation que Dieu a employé seulement les Roys & Iuges pour la reformation de son seruice & correction des pasteurs. 21.

L'origine & le temps de la grandeur de l'Ecclesiastique, par qui & pour quelles causes il fut si haut esleué. 23.

La grande difficulté qu'il y a a ranger l'Ecclesiastique en son ordre, avecques les prodigieux effects de son accroissement. 27.

Argumens pour rabbaïsser les pasteurs, tireZ de leurs noms, de la definition qui leur compete, de l'autorité de Christ, & de son exemple. 28.

Representation de la grande alteration qui possede les pasteurs à aspirer aux grandeurs du monde en la personne d'aucuns des Apostres. 30.

Definition des Magistrats, & quels noms honorables

- & de Maïesté leur sont attribuez en l'Escripture. 32
 Que les noms que l'Escripture attribue aux pasteurs ne
 tendent qu'à les humilier, & que c'est combattre
 contre loix diuines & humaines de les preferer
 aux Roys & leurs Iuges. 35.
 Explication du reiglement que Dieu veut estre obser-
 ué, tant pour son regard que des Pasteurs & Ma-
 gistrats. 37.
 Renuersément de l'ordre establi de Dieu par les pa-
 steurs causes des calamitez deplorables dont les
 peuples sont affligez. 39
 Preuue comme pour auoir souffert à l'Ecclesiastique
 d'introduire telles traditions; il s'auance iusques à
 un extrefine desbordement. 42.
 Acceleration des Ministres à forger nouvelles loix
 moins supportables qu'aux autres. 45.
 Des loix des Magistrats, de leur excellence, & de la
 benediction diuine qui les accompagne. 48.
 Que c'est chose repugnante à la vocation des Pasteurs,
 veu que l'infirmité humaine est si foible qu'elle ne
 scauroit accomplir les dix Commandemens. 50.
 Comme par l'autorité de Sainct Pierre les Ecclesia-
 stiques n'ont seigneurie ne pouuoir de faire loix 52
 Le chemin par lequel Dieu veut donner gloire à l'Ec-
 clesiastique, c'est en s'abbaissant premierement. 54
 Exemples de la Vierge Marie & de sainct Iean, ayans
 passé par le chemin d'humilité. 57.
 Que la simplicité est la robbe de laquelle les Pasteurs
 doyuent estre reuestus pour se rendre honorables. 58
 Comme les Ecclesiastiques doyuent paistre leurs trou-
 peaux, & quelle pasture ils leur doyuent donner. 60
 Que les Pasteurs sont medecins spirituels, qui doyuent
 cognoistre les maladies de l'ame, & remedes pour

en guarir.

64

Que Christ est le Chef de l'Eglise, & comme les hommes ne sont propres à telle dignité.

66

Que c'est vn erreur trop grossier que de penser que l'Eglise de Dieu soit edifiee sur saint Pierre.

69

Confutation de l'argument des Pasteurs prins de la recognoissance publique de Theodose pour defendre la preference qu'ils affectent.

71

Que pour reigler ou reformer l'Eglise tous estats y doyuent estre appelez, comme y ayans pareil interest, & que c'est aux Magistrats à y tenir la presceance.

71

L'ignorance des Magistrats de ces derniers temps, cause que l'Ecclesiastique les a ainsi r'auallé.

76

Fin artifice de l'Ecclesiastique d'auoir fait croire aux Magistrats que ce n'estoit leur estat d'apprendre l'Escripture, & qu'ils s'en deuoyent reposer sur luy.

78

Que les Potentats de ce temps ont vn beau suiet de gloire s'ils recouurent leur prerogative que ceux ou ils ont succedé ont perdue.

81

Declaration des causes qui nous ont engendré ce desordre & les miseres ou nous sommes tombe.


82


Remedes conuenables, tant pour establir vn bon ordre, que pour preuenir qu'on ne retombe aux miseres ou nous sommes.


85


Exhortation aux humbles pasteurs qui ne se sont laissé emporter à la gloire du monde, de se ioindre aux Magistrats, & s'opposer contre l'ambition des autres.


87






















THE
NEWBERRY
LIBRARY

